

БИБЛИОТЕКА

K 3162  
1a

„ოռდნეა“-ს გამოცემა № 21.

# რაჭალი

ქველი და ახალი შენიშვნები

6. ნიკოლაპისა

2498


თბილისი

ელექტრომბეჭდავი თ. გრ. ლიასამიძისა.

1905.

9(52)

წიგნის მაღაზის „ცოდნა“-ს გამოცემა № 21.





~~1. 9(59)  
8-680~~

Ա Յ Ց Թ Բ Ո Ւ

մշակույթի և սպորտի նախարարություն

~~58924~~  
Հ 3/62  
/ 106. 60 դրամափուստ



1903060

Ելեկտրոմեծելեզու տ. ջր. գումարածության համարակալիք

1904.

Խ. 3. 2019-29526

ՀԱՅ 96 1952

## წინასიტყვა ሚბა.

ბევრი შთხოვს და მირჩევს — ის წერილი გადა-  
მდგბეჭდო ეხლა „იაპონიის ბრძოლაზე ჩინეთთან“,  
რომელიც სწორეთ ამ ათი წლის წინეთ „მთამ-  
ბის“ უცხოეთის მიმოხილვისთვის დაგწერე (1894,  
№ 9). იაპონიის გამოლაშქრებას რესეტზე თურმე  
ჩვენებური მკითხველის უურადღება მაუქცევია ეხლა  
ამ ძველ ნაწერისთვის, რომელმაც თავის დროზე —  
როგორც სხვა ჩემის შრომამ — უდაბნოში მღალადე-  
ბლის ხმასავით ჩაიარა. ვასრულებ ამ სურვილს და  
შეუცვლელათ ვაბეჭდვინებ ხელახლავ ამ ძველ შე-  
ნიშვნებს, იმ იმედით, რომ მათ, როგორც ჩინე-  
ბულათ დაგიწეუბულთ, იქნება ახალი ხილის გემო  
მიეცეს დღეს, როცა უველავ ასე ეხალისება იაპო-  
ნიის შესახებ ამბების კითხვა.

„შეუცვლელათ ვაბეჭდვინებ“ მეოქი. ამ თქმას  
არი რამ უნდა დავუმატო: ძველს ნაწერში ვაკებ  
ეხლა ერთს მცარე ადგილს ისეთს, რომლის გა-  
მოტოვება იმ დროს მშერლისგან დამთუკიდებელმა  
გარემოებამ გვიძებულა. დანარჩენი სიტყვა-სიტყვით  
ისე იბეჭდება, როგორც ამ ათის წლის წინ, „მთ-

ამბეჭი". შეთრე დამატება იმის ასსნაა, თუ რა-  
მოდენათ შეიცვალა, არა თუ გარემოება, თვით ერ-  
თი და იმავე სიტუაციის მნიშვნელობა ამ უკანას-  
კნელ თის წლის განმავლობაში. ამ ცვლილების გა-  
ნუმარტებლათ მკითხველი ცხადათ გერ დაინახავს  
გერც ეხლანდელ დამის მაზეზს, გერც მის შე-  
დეგს. ამიტომ, ძველ ნაწერის გადაკითხვის შემ-  
ჩერ საჭირო გახდა ახალ განმარტების დაწერა  
იმის შესახებ, თუ რა და რა ნაირი ცვლილება მო-  
ხდა 1894 წლის აქეთ იმ სიტუაციის, სახელების  
და აზრების მნიშვნელობაში, რომელზედაც ჩემს  
ქველ ნაწერში იყო მსჯელობა. ამ ახალ განმარ-  
ტების გაცნობა დაგარწმუნებით, რომ დღეს მეცნი-  
ერებისათვის აღარაფერია უცარი, უცაბედი, წარ-  
მოუდგენელი, წინათვე გაუზღმავი თანამედროვე  
ისტორიის მსვლელობაში, ისე როგორც მთელს ბუნე-  
ბაში. უცაბედათ ეს უცელაფერი მარტო იმას მიან-  
ია, ვინც ამ დროის მეცნიერების იარაღს არ იც-  
ნობს, ვერ ხმარობს და ვარსკვლავთ-მრიცხაობას  
კი თავს არ ანებებს. აი ამათზეა ძველი ნათქვა-  
მი: „რეგგენი საქმეს წაახდენს, ფათერაპს დაბრა-  
ლებსო".

## I. იაკონის ბრძოლა ჩიხეთთან

(1894)

— ნეტა რა მეჩინეთება,—იფიქრებს მკითხველი,—სად იაპონია და სად ჩვენო? აბა რა მენაღვლება, თუ სადღაც, ცხრა მთას გადაღმა, რაღაც ომი ამტყდარაო!

რაკი ამ ბრძოლას მთელმა განათლებულმა ქვეყანამ მიაქცია ყურადღება, ნურც შენ დაიზარებ, ჩემო კეთილო, მისი ამბავი და მნიშვნელობა გამოიკვლიო. დარწმუნებული ბრძანდებოდე, ტყუილა-უბრალოთ როდი შეაჩერდებოდა ქვეყანა ამ ბრძოლას, თუ არ გრძნობდეს, რომ იმას მას საკუთარ ბედზედაც პირდაპირი გავლენა ექნება ადრე თუ გვიან. ქვეყანა მოცლილი როდია, რომ უმნიშვნელო საქმეებზე მსჯელობდეს... ნურც იმას იფიქრებ, ვითომ მართლა მოშორებული იყოს შენზე ან ჩვენზე ამ ომის ასპარეზი — კორეა. ეს სამეფო რუსეთის მოსაზღვრე გახლავს: მასა და რუსეთს შუა ერთი პატია მდინარის, ტუმენ-წიანის, მეტი არა მოიძებნება-რა. ყველა დარწმუნებუ

ლია, რომ რუსეთს ამ სამეფოში დიდი ინტერესი აქვს, მერე ისეთი, რომლის დაცვა, იქნება, უომოთ არც კი მოხერხდესო. და როგორც ჩვენს მხარეში ბრძოლა რუსეთისა ვისმესთან ყოველთვის ციმბირის ბეღზე და ცხოვრებაზე ღრმა კვალს აჩნევს, ისე ციმბირის საზღვრებზე რუსეთის უცხოეთთან შეტაკება, უეჭველია, ჩვენზედაც დიდ გავლენას იქონიებს. თუ კი იმისთანა უდავო და უბრალო საქმეს, როგორც ციმბირის რკინის გზის კეთებაა, ის შედეგი მოჰყვა ჩვენთვის, რომ თითქმ ყოველგვარი შენება ათი წლის ვადით შესწყდა და გადაიდო ჩვენს მხარეში, ნუ თუ მოსალოდნელი არ უნდა იყოს, რომ იმ მხარეში გამართულ ომს უფრო პირდაპირი, უფრო ძლიერი გავლენა ექნება ჩვენზე?.. იი, ამიტომაც სასარგებლოა გავიგოთ — რა დავიდარაბაა ატეხილი იმ მხარეში და რას ნიშნავს იქიდან მიღებული ამბები?

ციმბირს სამხრეთით და რუსის საშუალო აზიას — აღმოსავლეთით ერთი უზარმაზარი, თვალ-უწვდენელი ქვეყანა აკრავს, ჩინეთი. აუარებელი, უთვალავი ხალხი ცხოვრობს ამ ქვეყანაში, თითქმის ოთხჯერ უმრავლესი, ვიდრე მთელი რუსეთის მცხოვრებლების რიცხვი. უთ-

ვალავი მეთქი, რადგანაც მისი ნამდვილი რაოდენობა არავინ იცის. საზოგადოთ კი ის ანგარიშია მიღებული, ვითომ ჩინეთში ოთხასი მილიონი ადამიანი ცხოვრობს, ან თითქმის ორჯელ უფრო მეტი, ვიდრე მთელს ევროპაში. ჩინეთი თორმეტი პროვინციისაგან შესდგება, რომელთაგან თვითეული მთელ გერმანიას ან საფრანგეთს უდრის სივრცითაც და მცხოვრებლების რიცხვითაც.

ეს უზარ-მაზარი სახელმწიფო, თურმე, დღესაც იმ წესით და წყობალებით ცხოვრობს, იმ იარაღით მუშაობს, იმ ზნეს და აზრებს ადგია, როგორც ამ ასი, ათასი, ან ათი-ათასი წლის წინათ. ხალხი მშვენიერი თვისებისაა: მეურნე, მშრომელი, წყნარი, მორჩილი, უჩხუბარი, უწყინარი, სხვა ყველა ხალხებზე უფრო ზომიერი სმა და ჭამაში და სხვ. და სხვ. საუბედუროთ, ამ ჩინებულ ხალხს თითქმის არავითარი მმართველობა და მართებლობა არ ჰყოლია თურმე. თვითეულ მხარეს ამ ვითომ-სახელმწიფოსას მართავს „უფროსი“, მანდარინი, რომლის დანიშნულება მარტო ბეგრის და ბაჟის მოკრეფაა. არავინ იცის—ვინ რამდენს იხდის, ვინ რამდენს ჰბოჭავს, არც ის, თუ სად მიდის

შეგროვებული გადასახადი. დაუჯერებელი საქ-  
მეა, თუმც ეს სრული ჭეშმარიტება გახლავს,  
რომ ჩინეთის მმართველობას, აი ამ ოთხას  
მიღიონ ადამიანის წარმომადგენელს, სულ  
**მარტო ასი მიღიონი ფრანკი** შემოუდის წე-  
ლიწადში, ისიც უფრო ზღვის-პირა საბაჟოები-  
დან. თითქმის არავითარი კავშირი არ არსე-  
ბობს არც სხვა-და-სხვა პროვინციებს შეა, არც  
მათსა და ტახტს შეა. თვითეული ქოროზი  
(намѣстникъ) თითქმის სრულიათ დამოუკიდე-  
ბელი მთავარია თავის პროვინციისა. ჩინეთის  
იმპერატორის გავლენა და უფლება უფრო  
ფიქტიურია, ვინემ ნამდვილი.

უწინდელ დროში ჩინეთი ყველას მართლა  
ძლიერ და შეურყვეველ სამეფოთ მიაჩნდა.  
1859—1860-ში ინგლისისა და საფრანგეთის  
შეერთებულმა ფლოტმა მოულოდნელათ მია-  
ყენა ჯარი ჩინეთის სატახტო ქალაქს პეკინგს,  
რომელიც მარტო სამასი ვერსით არის დაშო-  
რებული ზღვის პირისაგან. ევროპელმა ჯარ-  
მა მეფის სასახლეც დაიჭირა და შიგ მსწრაფ-  
ლათ დაადგინა მორიგების პირობა ჩინეთის  
მთავრობასთან, რომ მსწრაფლათვე დაბრუნება  
შესძლებოდა. მაშინ ყველას ეგონა, რომ მარ-

ტო მოულოდნელობის წყალობით გაიმარჯვა  
ევროპამათ, თორემ ჩინეთს რომ სცოდნოდა  
ან დასცლოდა, ჯარს ან ხალხს მიღიონობით  
შეჰქრებდა და თავს დაასხამდა ევროპელებსათ.  
ოც და ხუთის წლის შემდეგ საფრანგეთმა დაი-  
კირა ჩინეთის სამხრეთ საზღვარზე ტონკინგი,  
ცალკე სამთავრო, რომელშიაც ოციოდე მი-  
ღიონი ხალხი ცხოვრობს და რომელიც ჩი-  
ნეთს ექვემდებარებოდა. ჩინეთმა საფრანგეთს  
წინაამღდევობა გაუწია და ომიც გაუმართა.  
მაგრამ საფრანგეთს დიდი ძალის მოხმარება არც  
კი დასჭირებია მის მოსაგერებლათ და დასამ-  
შვიდებლათ. რამდენიმე ბატალიონი ეყო ჩინე-  
თის ჯარის დასამარცხებლათ და ოც მიღიო-  
ნიან სამთავროს შესაძენათ. არც ამ გარემოე-  
ბამ აუხილა ქვეყანას თვალი ჩინეთის სისუსტის  
შესახებ. ყველას ეგონა, ტონკინგი (ან ტონ-  
კინი) აღმართ დადი ხანია მოშორებული და  
გამოტირებული ჰქონია ჩინეთს, ასე ადვილათ  
რომ ჩამოართვესო.

ამ უკანასკნელ ხანებში განსაკუთრებით ხელს  
აფარებდა ჩინეთს ინგლისი, რომლის მწერლო-  
ბა და დიპლომატია განვითარება აზვიადებდა ჩინე-  
თის სახელ-დიდებას. მაგრამ ჩინეთი ცოტ-ცოტა

და ნელ-ნელა შეისწავლეს მისმა მახლობელმა მეზობლებმა: რუსეთმა და საფრანგეთმა. მათმა მეცნიერებმა და აფიცრებმა გადაიარეს კიდით-კიდემდე ეს ოვალუწვდენელი სამეფო. მათი აღწერილობიდან ის საზოგადო აზრი გამოჰყავს კაცს, რომ ჩინეთი მართლა უთვალავი ხალხითაა დასახლებული, რომ მასში ტევა აღარაა, მაგრამ ეს სამეფო, თან, სრულიად მოუწყობელი, უთავბოლო, უწესო ქვეყანაა. მას არც ჯარი ჰყავს, არც გზები აქვს, არც რიგი, არც რამე აცხია იმ სიკეთისა, რომელიც კაცობრიობისთვის საზოგადო ცხოვრებას და მმართვას მიუნიჭებია. ეს ურიცხვი ხალხი, ეს უზარმაზარი სამეფო უფრო ცხვრის ფარას ემსგავსება, ვინემ ადამიანების გროვასო. აქედან, რასაკვირველია, ნელ-ნელა ის აზრი დაიბადა და გავრცელდა მეზობლებში, რომ ეს სამეფო მკვდარი ან რომა-კვდავი ყოფილაო და მისი ნაშთიდან ჩვენთვის აბა რა და რომელია უმჯობესი და ან რომელი გვერგებაო?

- ამ გვარად ჩინეთი აზიაში სწორეთ იმნაირ-სავე „ავათმყოფს“ წარმოგვიდგენს და იმნაირ-სავე „აღმოსავლეთურ კითხვას“ შეადგენს, როგორც ევროპაში—ოსმალეთი.

შედარების სრულ მსგავსებისთვის საჭიროა  
ცოტაოდნათ საგანს გადავუხვიოთ.

რუსეთი დიდი და ძლიერი სახელმწიფოა,  
რომელსაც დედა მიწაზე, ინგლისს გარდა,  
ტოლი არა ჰყავს და რომელსაც, ინგლისივით,  
მეექვსედი ნაწილი უჭირავს ხმელეთისა. საუ-  
ბედუროთ, ეს დიდი და ძლიერი სამეფო ყო-  
ველ-მხრივ ხელ-შეკრულია იმ გარემოებით, რომ  
იმას არსაით გზა არ აქვს „გაშლილ ზღვი-  
საკენ“. აიღეთ მისი რუქა, თვალი შემოაფ-  
ლეთ მის საზღვრებს და ნახავთ, რომ აღმო-  
სავლეთით მის მოსაზღვრე იაპონიის ზღვას მარ-  
ტო ერთი ხეირიანი სრუტე აქვს გაშლილ ოკეა-  
ნესკენ, იაპონიას და კორეას შუა, და ეს სრუ-  
ტეც ჩინეთს და იაპონიას უჭირავს. სამხრეთით  
მის მოსაზღვრე შავი ზღვიდან მარტო ერთი  
სრუტე მოიძიება, ბოსფორი (სტამბოლთან), და  
ამისი კლიტეც სხვას, ოსმალეთს, აბარია. და-  
სავლეთით, ბალტიის ზღვის კარი და კლიტე  
დანიას, შვეციას და გერმანიას აქვთ დაკავებუ-  
ლი. მარტო ერთ მის ზღვას, თეთრ ზღვას, არ  
ადევს ვიწრო კლიტე-ბოქლომი: ის ფართოთ  
ერთვის ჩრდილოეთის ოკეანეს. მაგრამ თვით  
ეს ზღვა და ოკეანე ერთიანათ შეკრულია ყი-

ნულით წელიწადში ცხრა ან ათი თვის განმა-  
ვლობაში. ამას გარდა თვით თეთრი ზღვა იმდე-  
ნათ მოშორებულია რუსეთის უმეტეს ნაწილზე,  
რომ მით ამ ორი-სამი თვის განმავლობაშიაც მარ-  
ტო ჩრდილოეთის უდაბნოს მცირედი ნაწილი  
თუ ისარგებლებს, მეტი ვერავინ. მაშასადამე,  
როგორც ხმელეთით, ისე ზღვითაც, რუსეთს  
ერთი ფუთი საქონლის არც გაგზავნა, არც მიღება  
არ შეუძლია უიმისოთ, რომ გზაზე უცხო სახელ-  
მწიფო არ დაუხვდეს, ხარკის ამღები მშვიდო-  
ბიანობის დროს და გზის შემკვრელი ომიანო-  
ბისას. ამის მიზეზით რუსეთის ეკონომიური  
ცხოვრება და რუსეთის აღებ-მიცემობა ჯერაც  
უცხოეთის მძლავრ გავლენის ქვეშ, თითქმის  
უცხოეთის მონობაში იმყოფება. რუსეთი უც-  
ხოეთის ხარკის მძლეველი იქნება, სანამ საკუ-  
თარ კარს არ გაიხსნის, საკუთარ გზას არ იშო-  
ვნის გაშლილ ოკეანესკენ, ისე, რომ პირდა-  
პირი და დამოუკიდებელი აღებ-მიცემობა გა-  
მართოს, ვისთანაც ჰსურს და ხელს მისცემს.  
დღეს კი რაც იმას თავის საკვებათ აზიიდან თუ  
ამერიკიდან საქონელი უნდა მოსდიოდეს (მა-  
გალითად, კოლონიური საქონელი, ურომლო-  
თაც გაძლება არ შეუძლიან), სხვისი საშუა-

ლებით ან შუამდგომლობით მოსდის, და არა  
პირდაპირ. რუსეთი ამ საქონელში შუა-მდგო-  
მელ ევროპას თითქმის იმოდენა ხარჯს უხდის,  
თუ არა უმეტესს, რამდენიც თვით ეს საქო-  
ნელი ღირს... ეს დამოკიდებულება ერთი უმ-  
თავრესი მიზეზთაგანია რუსეთის სილარიბისა.  
ყოვლათ შეუძლებელია, რომ ხეირიან ეკონო-  
მიურ მდგომარეობას ეღირსოს ის სახელმწიფო,  
რომელიც ამ გვარად უგზო-უკვლოა.

ეს ნაკლი ჩინებულათ ესმოდა ყველა შორ-  
გამჭვრეტ მეთაურს რუსეთის ისტორიისას—  
ივანე მრისხანეს, პეტრე დიდს, ეკატერინე მეო-  
რეს, განსაკუთრებით პოტემკინს. მთელ რუსე-  
თის ისტორიას, ამ სამ უკანასკნელ საუკუნის  
განმავლობაში, ნათლათ აჩნია ეს ერთი უმთა-  
ვრესი ხასიათი: ნიადაგი ცდა ზღვის-პირების და  
ზღვის სრუტეების შეძენისა. ეს ისეთი ბუნებ-  
რივი საჭიროებაა, რომ თითქმის ინსტიქტიუ-  
რათ მიზიდვის რუსეთი ამ მიზნისკენ. ათასი  
მისი უთავ-ბოლო ომებიდან, განსაკუთრებით  
მეთვრამეტე საუკუნეში და ზოგი ეხლანდელ-  
შიაც, მარტო ის ომები გამოვიდა სახეირო, ის  
ომები ჩაიბეჭდა ერის მეხსიერებაში, რომელ-  
ნიც აი ამ ისტორიულ და ეკონომიურ საჭი-  
როებით იყვნენ გამოწვეულნი.

დღეს რუსეთი ციმბირის მოწყობას შეუდგა. ის იქ ეხლა რკინის გზას აკეთებს იმისთანას, რომელმაც მთელი ციმბირი უნდა გადასჭრას კიდით კიდემდე, ათი ათასი ვერსტის სიგრძეზე. უეჭველია, ეს რკინის გზა, მისი გათავების შემდეგვე, გავლენას იქონიებს არამც თუ მარტო ციმბირის ეკონომიურ მდგომარეობაზე, არამედ თვით შორე-აღმოსავლეთის მისვლა-მოსვლაზე და აღებ-მიცემობაზედაც. დიდ მოძრაობას მოხდენს ეს რკინის გზა განსაკუთრებით მით, რომ ევროპას დაუახლოვებს წყნარ ოკეანეს ნაპირებს, მათ შორის იაპონიას და ჩინეთსაც. დღეს თუ მთელი თვე უნდება კაცი, ან წიგნი, ან საქონელი, ლონდონიდან ჩინეთში მისვლას, ციმბირის რკინის გზის დასრულების შემდეგ ათი, თორმეტი დღის მეტი როდი-ლა დასჭირდება... ამასთანავე რუსეთს, ამ გზის მეოხებით, სრული საშუალება ეძლევა თვალ-უწვდენელ ციმბირის ნაყოფიერი მინდვრები, აქამდინ უხალხო და უკულტურო, რიგიანად დაასახლოს, თუნდ ჩინელი ხალხით, და აყვავებულ მრეწველობის ასპარეზათ აქციოს. შორე-აღმოსავლეთის ას-ას მილიონიანი სახელმწიფოები საკმაო და ჩინებული გამსაღებელი იქნებიან ამ მრეწველობის ნაწარმოებისა.

ეს რკინის გზა თავდება (ან იწყება) ვლადი-  
ვოსტოკს, ნავთ-საყუდარს იაპონიის ზღვაზე,  
კორეას საზღვარის ახლო. იაპონიის ზღვას  
დასავლეთით კორეა აკრავს და აღმოსავ-  
ლეთით — იაპონია. როგორც წელი მოგახსე-  
ნეთ, ამ ზღვაზე მარტო ერთი რიგიანი \*)  
სრუტეა — ის ადგილი, საცა სამხრეთით კო-  
რეა და იაპონია ერთმანეთს უახლოვდება. ამ  
კარს „ბრაუტონის სრუტე“ ჰქვია. იაპონიის  
ზღვას ეს კარი სწორეთ იმ რიგათვე ჰკეტავს,  
როგორც გიბრალტარი — ხმელთა-შუა ზღვას,  
ან ბოსფორი — შავ-ზღვას. ამ გასავალში, რო-  
გორც ყოველგან დედა-მიწაზე, საცა კი მო-  
ხერხებული კარი ან საკეტი აქვს რომელიმე  
ზღვას, ინგლისს ერთი ჩინებული ნავთ-საყუდა-  
რი და კუნძული ჰქონდა აჩენილი და დაჭე-  
რილი, საიდანაც ადვილათ შეეძლო, როცა  
მოინდომებდა, ერთიანათ დაეკეტა იაპონიის  
ზღვა, ისე რომ შიგ, უიმისოდ, შესვლა ვერა-  
ვის შეძლებოდეს. ამ ნავთ-საყუდარს სახელათ  
„პორტ-ჰამილტონი“ დაერქვა. 1884-ში, რო-

\*) რაღან ყველა სხვა სრუტე მარტო იაპონიის  
ხელშია და ზამთრობით იყინება

კა რუსეთსა და ინგლისს შუა დავიდარაბა იყო  
ატეხილი ავღანისტანის თაობაზე, რუსეთმა ინ-  
გლისს ჰამილტონის დაცლა და მიტოვება მო-  
სთხოვა: თქვენი იქ ყოფნა გზას მიკრავს ჩემი  
„პრიმორსკი ობლასტისთვისო“. ინგლისმა (მა-  
შინ მის საქმეებს გლადსტონი მართავდა) სა-  
მაგიეროთ მოსთხოვა — პირობა დამიდევი რომ  
კორეას ხელი არ ახლოო, მაშინ მე ჰამილ-  
ტონის კუნძულს დავცლიო. პორტ-ჰამილტო-  
ნის ჯერ დაჭერა და მერე დაცლა ცოტათი  
იმას გავდა, „კურტანი კურტანზე არ დაად-  
გაო“. თორემ მანამდე რუსეთს გაგებაც კი არ  
ჰქონია ამ მხარეში სრუტეების მნიშვნელობისა,  
რადგანაც 1875-ში რუსეთმა თავის ნებით  
დაუთმო იაპონიას ჩრდილოეთი სრუტეები თა-  
ვისი ოხოტსკის ზვიდან გაშლილ ოკეანესკენ,  
როცა სახალინის კუნძულის ნახევარში ყვე-  
ლა თავისი კურილის კუნძულები (Куриль-  
ские острова) გაცვალა. ისიც კი მართალია,  
რომ ეს სრუტეები, როგორც ყველა ჩრდი-  
ლოეთის სრუტეები იაპონიის ზღვიდან, შვიდი,  
რვა ან ცხრა თვის განმავლობაში გაყინული  
და უხმარია გემებისთვის.

რაკი იაპონიის ზღვიდან, ციმბირის აღებ-მა-

ცემობას და სამხედრო ფლოტს საკუთარი სრუ-  
ტე არა აქვს, ბევრათ ემჯობინებოდა ციმბი-  
რის რკინის გზის გაყვანის დაწყებამდე ეშოვათ  
ეს სრუტე. მაშინ ამას უფრო ადვილათ, უფრო  
იაფათ დაუთმობდნენ რუსეთს, ვიდრე ეხლა,  
როცა რკინის გზის გაყვანას არ შეეძლო ინ-  
გლისი არ გაეფრთხილებინა. რკინის გზა რუ-  
სეთს ადვილ საშუალებას მისცემს, რამდენიც  
ჟისურს, იმდენი ჯარი და იარაღი მიზიდოს რუ-  
სეთიდან ვლადივოსტოკს. აქ მომავალში რუ-  
სეთი, უეპველია, დიდ ფლოტს გაიმართავს.  
თუ იმას მაშინ თავისუფალი გასავალი გზა ექნა  
იაპონიის ზღვიდან გაშლილ ოკეანესკენ, ად-  
ვილად მოუხერხდება საკუთარი ალებ-მიცემო-  
ბაც გაიმართოს ჩინეთთან და აღმოსავლეთთან  
და თან, როცა მოინდომებს, ჯარიც დაასხას  
ინგლისის სამფლობელოს ინდოეთში და ავსტ-  
რალიაში. აქედან ცხადია, რომ ინგლისმა ყო-  
ველი ღონისძიება უნდა იხმაროს, რაც კი მოუ-  
ხერხდება, იაპონიის ზღვის სრუტეს შესაკრა-  
ვათ. თუ ეს სრუტე, ან თუნდ მარტო ერთი  
მისი მხარე, რუსეთის ხელში ჩავარდა, ცხადია,  
რომ რუსეთი ინგლისის მზრუნველობიდან თავს  
იხსნის ვაჭრობის და ნაოსნობის საქმეებში

მის მეტოქეთ გახდება მარტო შორე-აღმოსავ-ლეთში კი არა, ინდოეთის ოკეანეშიაც.

იაპონიის ზღვის სრუტე ერთის მხრით ია-პონიას უჭირავს, მეორეს მხრით—კორეაში, რომელიც ცალკე სამეფოა, ჩინეთის იმპერატო-რის ვითომ ხელ-ქვეითია. კორეა იაპონიის ზღვასა ჰყოფს ყვითელი ზღვიდან. ამ ორ ზღვას შუა იმას უკავია სიგრძეზე რვა-ასი ვერსტი და სიგანით კი—ორასი ვერსტი. სამი მხრით იმას, 1800 ვერსტის სიგრძეზე, ზღვები უვლის; ხმე-ლეთს კი მარტო ორასიოდე ვერსტის სიგრძე-ზე აკრავს ეს ნახევარ-კუნძული. ამ სივრცეზე კორეაში თორმეტი მილიონი ხალხი ცხოვ-რობს, ან თითქმის ორჯერ მეტი, ვიდრე კავ-კასიაში. საუბედუროთ, ეს ხალხი და ქვეყანა სწორეთ ისე მოუწყობელი და ჩამოქვეითებუ-ლია, როგორც ჩინეთი, თუ უფრო მეტათ არა. თითქმის სრულიათ ველურ მდგომარეობაში იმ-ყოფება მისი ღატაკი და უმეცარი ხალხი. მა-შასადამე, ამ სამთავროს ბედიც ისე გადაწყვე-ტილია, როგორც ჩინეთისა: არავინ იცის ჯერ, ვინ დაიჭერს, დაიმონებს და შთანთქავს, მაგრამ ის კი ყველასთვის ცხადი და უდავოა, რომ ვისმე ულუფიათ უნდა ერგოს... წინა კა-

ცი უკანასთვის, უწინდელის შეხედულებით, წინამძღოლი, გზის განმანათებელი, დამხმარე უნდა ყოფილიყო. ეხლა კი დაწინაურებული ერები იმ მოძღვრებას დასდგომიან, რომ დაწინაურებულმა უკან ჩამორჩენილი უნდა დამონოს და ხრასო... დრონი მეფობენ. ცუდი მოძღვრებაა ეს მოძღვრება, უსინიდისო, ველური; მაგრამ ლანძღვით და ტირილით მის ძალას ვერავინ შემუსრავს. მისი მოსაგერებელი მარტო ერთი საშუალებაა: ვერიდოთ უკან ჩამორჩენას, დავწინაურდეთ... და რაკი კორეა უკან ჩამორჩენილია, ყველასთვის აშკარაა დღეს, რომ იაპონიის ზღვის გასახსნელი ან დასაკეტი კარი და კლიტე მარტო კორეაში უნდა იშოვოს ან რუსეთმა, ან ინგლისმა. ვინ ჩაიგდებს წელში ამ კარსა და კლიტეს? გაიხსნის თუ არა რუსეთი გზას გაშლილ ოკეანესკენ, ან მოახერხებს თუ არა ინგლისი მაგარი რაზა-კოჭაკი დაადოს იმ ერთად-ერთს სრუტეს იაპონიის ზღვისას, რომელიც რუსეთის ფლოტს წინ უძევს კორეას სამხრეთის წვერთან? ვინ იცის.

მარტო კორეას მხრით, მარტო კორეაში შეიძლება მეთქი კარისა და გზის შეძენა, თუ შეკვრა. მართლაც, ბრაუტონის სრუტეს ერთი

კიდე კორეას ეკუთვნის და მეორე კი—იაპონიას, რომელიც ისე დაწინაურდა ამ უკანასკნელ ოცდა ხუთი წლის განმავლობაში, რომ მას აგრე ადვილად ვერც ერთი ევროპის სახელმწიფო ველარ შეეტაკება და ძალით ვეღარასთერს წაართმევს. ეს სახელმწიფო ერთობ დიდ და ნათელს მაგალითს წარმოგვიდგენს იმასას, თუ რა ადვილი ყოფილა თითქმის სრულაათ ველურ და უკან ჩამორჩენილ ხალხისთვის სწავლით და რიგიანის წესით წელში გამართვა და ძალის შეძენა, როცა მას გონიერი მთავრობა ჰყავს და ბეჯითი სურვილი აქვს რაგიანი ადგილი დაიკავოს სხვა ერთა და სამეფოებს შუა...

ამ ოცდა ათი წლის წინათ, 1863-ში, მთელი იაპონია სწორეთ იმგვარსავე ველურ მდგომარეობაში იმყოფებოდა, როგორ შიაც ჩინეთი და კორეა დღემდინაც არიან ჩაფლული. ამ წელიწადში იაპონიას, სხვა-და-სხვა ძარცვისა და ველურ მოქმედების გამო, ინგლისის და საფრანგეთის ფლოტი თავს დაესხა მძარცველების დასასჯელათ. ევროპულ ზარბაზნებს და ჯარს, რასაკვირველია, ვერაფერი დაუდგა წინ. იაპონიის მთავრობას და დამნაშავეებს ევრო-

პელებმა ჯარიმა გადაახდევინეს და თავი დაანებეს. ამ გარემოებამ მთელ ქვეყანას დაანახვა იაპონიის სიძაბუნე. მაგრამ თვითონ ხალხი, მეტად მეცადინი, მარჯვე, გამბედავი და თავმოყვარე, ერთიანად შეიძრა, როცა სხვისი უპირატესობა და თავისი უკან ჩამორჩენა იგრძნო და დაინახა. უნდა ვიცოდეთ, რომ იაპონია სულ ერთიანათ მარტო კუნძულებიდან შესდგება. სულ 3850 კუნძული ითვლება იაპონიაში და ამ კუნძულებზე ორმოციოდე მილიონი ხალხი ცხოვრობს, რომლის სისხლი ნარევია მონგოლის და ჩინურ მოდგმისა. ამ კუნძულებს ერთმანეთში და ჩინეთთან ძველის დროიდან დიდი აღებ-მიცემობა ჰქონდათ გამართული, ისე რომ მრეწველობა და ვაჭრობა იაპონიაში გაჩაღებული იყო. პოლიტიკური წყაბილება ამ ქვეყნისა ერთობ დაძველებული და დასუსტებული ყოფილა. მის მეფეს, მიკადოს, — რომლის უფლება ძველ დროში სასულიეროც ყოფილა და სამხედროც, — რომ ვეღარ შეძლებია ამოდენა გაცალცალკევებულ კუნძულების მართვა და დამორჩილება, თავისი სამხედრო უფლება გადაუცია, მეთორმეტე საუკუნეში, იმისი მოწინააღმდეგე თავადისთვის,

რომელიც დაპირებია — ყველა სხვა შენს ურჩ  
თავადებს დავიმორჩილებ, შენ სასულიერო მე-  
ფე იყავი მთელის იაპონიისა, მე კი სამხედრო  
და სამოქალაქო აღმსრულებელი გავხდები შე-  
ნის ბრძანებისაო. ამ თავადს, სახელათ **იორი-ტომოს**, მაშინ სიოგუნის ან **ტაიკუნის** ლირ-  
სება მიეცა. მას აქეთ იაპონიაში, 1863-მდე,  
ორი მეფე იჯდა ტახტზე, სხვა-და-სხვა ქალაქ-  
ში. ერთი, სიოგუნი თუ ტაიკუნი, სამოქალა-  
ქო და სამხედრო მმართველი იყო მთელის ია-  
პონიისა, და მეორე, მიკადო, მარტო სასული-  
ერო საქმეებს მართავდა, თუმც უფროს იმპე-  
რატორად კი ითვლებოდა. ორივე ამ მეფის  
უფლება იმნაირათვე ფიქტიური იყო, რო-  
გორც დღეს ჩინეთის იმპერატორის მეფობაა.  
თვითეულ კუნძულზე ან კუნძულის ნაწილზე  
ნამდვილი ბრძანებლობა თავადებს, **დაიმიო-სებს**, ჰქონდათ. ესენი მეფეებს არც კი ემორ-  
ჩილებოდნენ და ხალხს, რამდენიც უნდოდათ,  
იმდენათ ავიწროებდნენ; განსაკუთრებით ნაწვა-  
ლები იყვნენ მათგან ვაჭრები და ხელოსნები:  
თვითეული დაიმიოსი თავისს საბრძანებელში  
არც უნდოდა იმ ბაჟს და გადასახადს ადებდა  
ხელოსნებს, მრეწველებს და ვაჭრებს.

ევროპელები რომ შინისკენ გაბრუნდნენ ჯა-  
რიმით დატვირთულები, ხალხში მოძრაობა და  
აჯანყება მოხდა. მაისის თვეში 1863 წ. გაჭირ-  
ვებულმა ტაიკუნმა **სტოტსბაშვა** მიკადოს სთხო-  
ვა—დაიბარე ყველა დაიმიოსები, ერთათ მოვი-  
აზროთ და გადავწყვიტოთ, როგორ მოვეწყოთ,  
რომ ამისთანა ლაფი მეორეჯერ აღარ დაგვე-  
სხასო. ასე მართვა აღარ შეიძლება ქვეყნისაო.  
მთავრობას და მმართველს ძალა უნდა ჰქონ-  
დეს, შემოსავალი, უფლება და სხვ., თორემ  
არც წესი იქნება შინაგანი, არც გარეგანი  
შშვიდობიანობა დაიცვებაო. მიკადომ, სახელად  
**მუწუკიტომ**, დაიბარა ყველა დაიმიოსები. ამ  
უკანასკნელთა კრებამ, ჯიბრზე, მიკადოს ძალა  
დაატანა და ბრძანება გამოაცემინა, დღეის იქით  
ტაიკუნობა ერთიანათ მოისპოსო. სამეფო უფ-  
ლება, როგორც სასულიერო, ისე სამხედრო  
და სამოქალაქო, ერთიანათ მიკადოს ჩაპბარდა.  
იმას გვერდით ამოუღვნენ ნიჭიერი დამხმარენი  
**ტოზა, საწუმა, ნაგოტო** და სხვ. და სხვ. ამ  
მიკადომ თითქმის ისეთივე ადგილი დაიჭირა  
იაპონიის ისტორიაში, როგორიც რუსეთისაში  
პეტრე დიდს უჭერია. რამდენიმე წლის განმა-  
ვლობაში მან ერთიანათ შესცვალა მთელი ში-

ნაგანი წყობილება იაპონიის სახელმწიფოსი. არც აცივა, არც აცხელა, პეტრე დიდისავით, აიღო და ერთიანათ, ერთბაშათ გადმოიღო ევ-  
როპის წესი, კანონი, წყობილება, იარაღი,  
ტანსაცმელი და სხვ. თან რაც პეტრეს არ მო-  
უქმედია, ისიც კი გაბედა: პარლამენტი დაა-  
არსა იაპონიაში სხვა-და-სხვა კუნძულების წარ-  
მომადგენლებისაგან. ამასთან მეორე საქმეც და-  
იწყო აგრეთვე პეტრესგან მიტოვებული: დაი-  
მიოსების უფლება მოსპო და ადგილ-მამულები  
სახაზინოთ ჩარიცხა. სამაგიეროთ დაიმიოსებს  
ზომიერი პენსია დაუნიშნა.

რაღა თქმა უნდა, ადვილი საქმე როდი იყო  
ეს ცვლილება, არც ერთბაშათ მიუღია ეს ია-  
პონელ ხალხს. 1863-შივე მოხდა პირველი  
აჯანყება ახალი წესის, თუ განზრახვის, წინაა-  
ღმდევგ. ეს აჯანყება ერთ ალაგას რომ დამარ-  
ცხდებოდა, მეორეზე ატყდებოდა, აქა-იქ. მის  
მეთაურათ, რასაკვირველია, დაიმიოსები და  
თვით მეფის ნათესავები იყვნენ. დიდი ბრძო-  
ლის შემდევ მიკადომ, როგორც იქნა, დაამარ-  
ცხა და დაამშვიდა ეს აჯანყება 1868-ში. მარ-  
ტო ამ გამარჯვების შემდევ იმას საშუალება  
მიეცა რეფორმები დაწყო, და მართლაც ამ

1868-დან იწყება ახალი ხანა იაპონიის ცხოვ-  
რებისა. დაიბარეს ნასწავლი და მეცნიერი პი-  
რები საფრანგეთიდან, ინგლისიდან, გერმანიი-  
დან, ამერიკიდან და თვით რუსეთიდან. უთვა-  
ლავი სასწავლებელი გამართეს იაპონიაში. ახალ-  
გაზდა იაპონელები ათასობით გაგზავნეს სწავ-  
ლის მისაღებათ ევროპაში თუ ამერიკაში, და  
იქ სასწავლებელში მიაბარეს სრულ, დამთავ-  
რებულ სწავლის მისაღებათ, ცოდნის სხვა-  
და-სხვა ნაწილზე. ზოგი სამხედრო სასწავლე-  
ბელში მისცეს, ზოგი—სანავოსნოში, ზოგი—  
ტეხნიკურში, ზოგი იურიდიულში და სხ. სწა-  
ვლა ყველას ბოლოდან კი არა, თავიდან, ანა-  
ბანიდან, დააწყებინეს. ამასაბაში მთავრობამ  
ევროპის და ამერიკის ქარხნებს შეუკვეთა ხო-  
მალდების აგება ახალ, უკანასკნელ შენო-  
ბისა. დაიბარა ინჟენრები იაპონიაში რკი-  
ნის გზების, ტელეგრაფის და ციხეების გასა-  
მართავათ, აფიცრები—ჯარის გასაწყობათ და  
გასაწროვნელით და სხვ. და სხვ. ათიოდე წე-  
ლიწადის შემდეგ იაპონიას საკუთარი ნასწავლი  
ყმაწვილებიც დაუბრუნდა შინ, ჩინებულათ, ევ-  
როპულიდ დამზადებულნი ქვექნის სამსახურის  
გასაწევათ, მასწავლებელნიც თავისი ელიტა,

აფიცრებიც, ინჟენრებიც, მენავეებიც, ტეხნოკებიც და სხვ. და სხვ.

საქმე არ დაჰკლებია არც ევროპელ ინსტრუქტორებისაგან გაწრთვნილ ჯარს და მმართველობას, არც საკუთრივ იაპონელ ახალ-თაობას, ევროპაში გამოზრდილს და ეხლა მართებლობის მეთაურად დაყენებულს. 1873-ში მთელს სამხრეთ იაპონიას ახალი აჯანყება მოედო, აგრეთვე დაიმიოსების მეთაურობით მომხდარი. ეს აჯანყება 1874-ის დამდეგში დაამარცხა და მოსპო შინაგან სააქმეების მინისტრმა **ოკუბომ**, ქალაქ საგას აღებით, ხანგრძლივ ბრძოლის შემდეგ. ორი წლის შემდეგ აჯანყება მოახდინა გენერალმა **ხიოგომ**, რომელმაც მთელი დიდი კუნძული კიუ-სიუ ააჯანყა და დაიჭირა. ეს აჯანყებაც, როგორც იქნა, დაამარცხა მთავრობამ. ორივე ამ აჯანყებასთან ბრძოლაში ახალი იაპონიის ჯარი და მმართველობა გამოიცადა და გაიწრთვნა და თან ჩინებული თვისების მექანი გამოდგა: მამაცობისა, დისციპლინისა და გასაჭირის ატანისა...

უფრო ხეირიანი ასპარეზი მიეცა იაპონიის ფლოტს და ჯარს 1874-ში. ჩინეთს ერთი დიდი

კუნძული ეკუთვნის, იაპონიის სამხრეთით, სა-  
ხელათ **ფორმოზა**. ეს კუნძული მეტათ მდი-  
დარია ქვა-ნახშირით და ძვირფას საუნჯეს შეად-  
გენს ყოველ სამეფოსთვის, რომელსაც კი ხო-  
მალდები ჰყავს და აღებ-მიცემობა აქვს გამარ-  
თული ზღვაზე. იაპონიას დიდი ხანია თვალი  
უჭირავს მაზედ. 1871-ში ერთი მისი სავაჭრო  
ხომალდი, ამ კუნძულთან დამდგარი ნახშირის  
გასატანათ, იქაურმა ველურმა მცხოვრებლებ-  
მა გაძარცვეს. იაპონიამ ჩინეთს მიმართა — ზა-  
რალი გადამიხადეო. ჩინეთმა უარი უთხრა: იქ  
ველური ხალხი ცხოვრობს, მე-არც კი მემორ-  
ჩილებაო. ხანგრძლივ მიწერ-მოწერის და მო-  
ლაპარაკების შემდეგ, იაპონიამ ჯარი გაგზავ-  
ნა 1873-ის მაისში ფორმოზის დასამორჩილებ-  
ლათ. გაიმართა ბრძოლა, რომელშიაც იაპო-  
ნიის ჯარი გამარჯვებული დარჩა. მთელი ფორ-  
მოზა იაპონიის ხელში ჩავარდა. მაშინ ინგლის-  
მა ჩინეთს თვალი აუხილა, როგორ შეიძლება  
ამისთანა საუნჯე იაპონიას დაანებო, შეურიგ-  
დიო, გიჯობს, რასაც თხოულობს, ყველაფე-  
რი გადაუხადო, ოლონდ კი კუნძული დაიბ-  
რუნოო და სხვ. ჩინეთი, ამის თანახმათ, იაპო-  
ნიას მოურიგდა (ოქტომბერი, 1874): გაძარ-

ცულ გემის ზარალიც გადაუხადა და ყველა  
ის ხარჯიც დაუბრუნა, რაც იაპონიას ფორ-  
მოზაში ჯარის გასაგზავნათ და საომრათ მოსვ-  
ლოდა. სულ გადაჭედა ჩინეთს ერთ მილიონ-  
ნახევარი მანეთი. ფორმოზა იაპონიამ ჩინეთს  
1874-ის დამლევს დაუბრუნა.

იაპონიის ხალხმა, გემო გაიღო თუ არა წარ-  
მატებისა, და დაინახა თუ არა თავის ჯარის  
გაწროვნილი რაზმები, თავის გემების იარალი  
და ძლიერება, მაშინვე კორეისკენ ცქერა  
დაიწყო. ეს მხარე დიდი ხანია სანატრია  
მისთვის. 1873-ის ბოლოს უმაღლესმა წოდე-  
ბამ უშველებელი მოძრაობა ასტეხა მოელს  
იაპონიაში — ეხლავე გავგზავნოთ ჯარი კო-  
რეის ასაღებათაო. მიკადოს მმართველობამ  
ვერ გაბედა ამ ხალხის სურვილს აჰყოლოდა,  
რაღვან, კორეაში ჯარა რომ გაეგზავნა, შან  
საკმაო ძალა აღარ დარჩებოდა არეულობის ან  
აჯანყების დასათრებუნად. შემდეგ, 1874 წელ-  
ში, ხელმეორეთ მოითხოვა ხალხმა კორეას  
დაჭერა. თვით კორეაზე, ზღვის პირათ, იმ  
ადგილას, საცა-ბრაუტონის სრუტე უფრო ვი-  
წროა, იაპონიას დიდი ხანია დაჭერილი აქვს  
ნავთ-საღგურიანი ქალაქი ფუ-ზან (ჰამილტო-

ნის პორტის ახლოს და პირდაპირ). ამ ქალაქ-ში 1874-ას ზაფხულზე იაპონიის ელჩები მოვიდნენ, კორეასთან სავაჭრო ტრაქტატის შესაღენათ. სანამ ეს ელჩები კორეის მხრით პასუხს ელოდნენ, მათი მომყვანი ხომალდი საქმეს შეუდგა და ახლო-მახლო ზღვის სიღრმეს ზომა დაუწყო. კოკის კუნძულთან რომ მივიდა ეს ხომალდი, იქაურ კოშკიდან მას ზარბაზნის ყუმბარები დაუშინეს. ხომალდის უფროსმა სამაგიერო პასუხი გასცა ზარბაზნით და არც ეს ამყოფინა: ჯარი ჩამოსვა ნაპირზე და კოშკის ასაღებათ გაგზავნა. მისვლა, დატკება, აღება და დაქცევა ერთი იყო. ხომალდი ამის შემდეგ ჯერ ფუ-ზანში და შემდეგ იაპონიაში დაბრუნდა. როცა ეს ამბავი იაპონელებმა გაიგეს, იმ წამშივე მოითხოვეს — ომი გამოეცხადოს კორეასო, ჯერ ერთი იმისთვის, რომ ჩვენი ელჩები არ დააკმაყოფილა, და მეორე იმისთვისაც, რომ უპატიურება მიაყენა ჩვენს გემს და დროშასო. თუმცა ამას თითქმის მთელი იაპონია თხოულობდა, მთავრობამ ვერც მაშინ გაბედა ამის დაწყება, აგრეთვე შინაური აჯანყების შიშით. შეიძლება შინაურ მტრის მორიდების გარდა ის იმასაც შეეჩერებინოს, რომ ორივე

მისი ახლობელი და ძლიერი მეზობელი, ჩინეთი და რუსეთი, ერთობ საშიში იყო მისთვის, და ორივე იმ დროს სრულიათ თავისუფალი იყო ყოველგვარ განსაცდელისაგან; ორივეს, მაშასადამე, აღვილათ შეეძლო იაპონიის გამოდევნა კორეიდან. ეს იქიდანაც სჩანს, რომ გაება თუ არა ჩინეთი საფრაგეთთან ომში, 1884-1885-ში, იაპონიამ მაშინვე კორეაზე გამოილაშქრა. მიზეზათ ის დაიხვია ხელზე, რომ კორეას ველური ხალხი იქ დასახლებულ ჩემ ვაჭრებს და ქვეშევრდომებს სძარცვავს და ავოწროვებსო. ჩინეთს იმ დროს კორეასთვის არ ეცალა და კორეას დაცვა არ შეეძლო. ამ მიზეზით იმან იაპონიასთან მორიგება არჩია.

6.(18) აპრილს 1885 ჩინეთსა და იაპონიას შეახელ-შეკრულობა დაიდა, რომლის ძალითაც ორივე სამეფოს ნება ეძლევათ, ვინიცობაა თუ კორეაში რამე მძიმე არეულობა (troubles graves) მოხდა, თავისი ჯარი გაგზაუნოს და თვითონ აღადგინოს წესი. ამ პირობის ძალით იაპონიამ პირდაპირი გავლენა შეიძინა კორეაში, რადგან თვით იმ სამეფომ, რომელსაც მანამდე ექვემდებარებოდა კორეა, ხელშეკრულობით იცნო იაპონიის მზრუნველობა კორეა-

ზე ყოველ არეულობის დროს, იცნო იაპონიის *condominium*'ობა, ესე იგი თითქმის იმნაირივე უფლება იაპონიისა კორეაზე, როგორიც თვით მას, ჩინეთს, ჰქონდა.

ამ გვარ მდგომარეობაში იყო საქმე, როცა წრეულს (1894) მარტის თვეში, კორეის სამხრეთ პროვინციებში დიდი არეულობა და აჯანყება ატყდა. ყოველ უფლებას, სწავლას და ქონებას მოკლებული ხალხი აჯანყდა მთავრობის წინააღმდეგ და კორეას ვითომ-ჯარი, აგრეთვე როგორც კორეის ვითომ-მთავრობა წინ იფრინა. მეფემ ორჯელ-სამჯერ ახალ-ახალი ჯარი გაგზავნა ახალი სარდლების წინამძღოლობით: ყველა დამარცხებული დაუბრუნდა. მაშინ ის ჩინეთისკენ მიიჭა: არიქა, მიშველე, ჯარი დამახმარეო. სანამ ჩინეთი ფიქრობდა და ჯარსა თუ იარაღს იმარაგებდა, იაპონიამ 1885-ის მორიგების ძალით თავისი რაზმები კიდევაც შეიყვანა კორეაში და სატახტო ქალაქი **სეული** კიდევაც დაიკავა. ამასობაში ჩინეთის ჯარიც შევიდა კორეაში. ადვილათ წარმოსადგენია, რით უნდა გათავებულიყო ეს მდგომარეობა. როგორც — სახარების სიტყვით ორ უფალს ვერავინ

ემსახურება, ისე, თურმე, ვერც ორი ბატონი  
ერთმანეთს შეეთვისება. ორი დათვი ერთათ  
ვერ სძლებს. ჩინეთმა იაპონიას წინადადება  
გაუგზავნა: რაკი აჯანყება დაბოლოვდა და  
წესიერება აღდგენილია, ჯარი გაიყვანე კო-  
რეილანო.—ვერაო, უპასუხა იაპონიამ: წესი  
მარტო იმან აღადგინა, რომ ჩემი ჯარი შემო-  
ვიყვანეო; თუ ჯარი გავიდა, შფოთიც ხელ-  
ახლავ ატყდება, რაღანაც ის მდგომარეობა არ  
შეცვლილა, რომელმაც არეულობა მოახდინაო.  
ჯარს მარტო მაშინ გავიყვან, როცა დავრწმუნ-  
დები და გარანტიაც მექნება, რომ კორეაში  
წესიერება შეურყევლათ არის დამყარებულიო.  
ამისთვის კი საჭიროა, რომ კორეას მეფე და  
მთავრობა მტკიცეთ დაადგეს რეფორმების გზას;  
იმან პირობა უნდა მომცეს აი ეს ოც და ხუთი  
უმთავრესი ცვლილება მოახდინოს თავის ქვე-  
უნის წეს-წყობილობაში. უამისოთ ჯარს არ  
გავიყვან კორეიდან, რაღანაც, რომ გავიყვა-  
ნო, მალე ხელ-ახლავ დამჭირდება მისი დაბრუ-  
ნება და ეს ერთობ ძვირათ ჯდება, ერთობ  
უანგარიშო იქნებაო.

სამი თვის განმავლობაში სულ ამ საგანზე  
იყო ბაასი, დავა და მოლაპარაკება. იქნება

სამი წელიც გაგრძელებულიყო ამ გვარი  
მდგომარეობა, იაპონია რომ არ დარწმუ-  
ნებულიყო, საქმის გაგრძელება ჩემთვის სასა-  
რგებლო როდი იქნებაო. ამ ანგარიშით მან  
ერთის მხრით კორეის მეფე ხელში იგდო და  
დაატუსაღა, და მეორეს მხრით ზღვაში დაახ-  
ვედრა თავისი ფლოტი იმ გემებს, რომელთაც  
ჩინეთის ჯარი მიჰყავდათ კორეისკენ; ერთი  
ამ გემებთაგანი კიდევაც დააღუპვინა, 1500  
მხედრით; სხვა კი ზოგი დაატუსაღებინა, ზოგიც  
დააზიანებინა. აქედან იწყება აშკარა ომი ჩი-  
ნეთსა და იაპონიას შეუა.

მალე გათავდება ეს ომი, თუ არა, ან რით  
გათავდება, ამას ვერავინ გადასწყვეტს, რად-  
განაც ნამდვილი მებრძოლი ამ ომში იაპონია  
და ჩინეთი კი არაა, რუსეთი და ინგლისი გახ-  
ლავან; ინგლისმა იანგარიშა ეს ასე კარგათ,  
თუ იაპონიამ, ვინ იცის! ნამდვილი კი ისაა,  
რომ ჩინებულათ ნაანგარიშევი და გამოზომი-  
ლია ეს საქმე. ყველაზე უფრო საგრძნობი კო-  
რეის ბედი მარტო რუსეთისათვის არის; მის-  
თვის, მისი ციმბირის აღმოსავლეთ ნაწილის-  
თვის, მისი ციმბირის ფლოტისა და რკინის  
გზისთვის კორეა და ბრაუტონის სრუტე სწო-

რედ რომ სიცოცხლის ან სიკვდილის მომნიჭებელია. საუბედუროთ, როცა აი ამ კორეის და ამ სრუტეს ბედი სწყდება ომის ველზე, როგორც რუსეთს, ისე მის ამხანაგს საფრანგეთს ხელ-ფეხი შეკრული აქვთ ევროპის მდგომარეოებით, ევროპის ომის მოლოდინით; ორივეს ძალის და ჯარის გაფანტვა ეზარება: საჭიროა მათი მთელი ძალა ევროპაში იქონიონ, სამთა-კავშირის ძალასთან დასაპირდაპირებლათ. მათ ჯარს ევროპაში იმოდენი რომ მოაკლდეს, რამდენიც, ვთქვათ, მარტო იაპონიასთან საბრძოლველათ დასჭირდება რუსეთს, მაშინ ევროპაში არც უკანასკნელს, არც საფრანგეთს განძრევაც აღარ მოუხერხდება. მერე კორეაში რუსეთმა ომი რომ გამართოს იაპონიასთან, განა ინგლისი გულ-ხელ დაკრეფილი დარჩება? ან იაპონიის ზღვაში რუსეთს რომ ომი აუტყდეს კორეის გულისთვის იაპონიასთან, ან იაპონიასთან და ინგლისთან, ვაი თუ სამთა-კავშირმა ამით ისარგებლოს ევროპაში იმ საშიშ კავშირის დასარღვევათ, რომელიც რუსეთსა და საფრანგებს შეუარსებობს? ეს კითხვები, ვისაც გნებავთ, იმას ჩააფიქრებს და დაალონებს.

რუსეთის პოლიტიკურ მწერლობას, რუსეთის უურნალ-გაზეთებს, ჯერეც ხეირიანათ არ ესმის ეს მდგომარეობა. ამ დღეებში გაზეთი „Новости“, მაგალითათ, სწერდა: კორეა რუსეთისთვის მით არის საჭირო, რომ გასასაღებელი ასპარეზი უშოვოთ ციმბირის მრეწველობას. ბევრს იყიდის, დიდ მოგებას მისცემს რუსეთს ეს ღატაკი და არაფრის მქონე, არაფრის მოსურნე ხალხი, რასაკვირველია! ის კი არავის ესმის, რომ ვისაც ბრაუტონის სრუტე ეკავება ხელში, იმას ციმბირის ალმოსავლეთის ნაწილის დაკეტვა, დამშევა და დახჩობა შეეძლება, და ვინც მთელ მილიარდს ხარჯავს ათი ათასი ვერსტის რკინის გზის გასაყვანათ, ის ვალდებულია გასავალი კარი უშოვოს და გაუხსნას ამ გზას და მისგან ალძრულ ქვეყანას, თუ მისი დაღუპვა არ უნდა...

საფრანგეთის პოლიტიკურ ცხოვრებაზე და მწერლობაზე კი იაპონიის შეტაკებამ ჩინეთთან საშინელი გავლენა იქონია. სრულიათ თავზარდაცემულის კილოთი სწერენ საფრანგეთის გაზეთები: ყოვლად საჭიროა საქმე იმავე მდგომარეობაში დარჩეს, როგორშიაც აქამდი იყო; კორეა ჩინეთის იყო და არის, ჩინეთის ხელ-

შივე უნდა დარჩეს, იაპონიას მასთან რა ხელი  
აქვსო! ევროპის ყველა სახელმწიფოები ერთ  
ხმით იმ პოლიტიკას უნდა დაადგნენ, რომ არა-  
ვის არავითარი ცვლილების თუ შეძენის ნება  
არ მიეცესო. რუსეთის უურნალ-გაზეთებიც,  
ბოლოს, აი ამ პოლიტიკას დაადგნენ, ალბათ  
მიხვდნენ, რომ ისევ ეს ემჯობანება ჩვენი ქვე-  
ყნისთვის, სანამ ევროპაში ომის მოლოდინი-  
დან არ განვთავისუფლდებითო. მაგიერათ სამ-  
თა კავშირის მწერლობა, თითქმ განგებ, ორი-  
ვე მხარეს აქეზებს ერთმანეთზე. მისთვის, აგ-  
რეთვე როგორც სამთა-კავშირისთვის, რასაკ-  
ვირველია, სასარგებლო და სასურველია, რომ  
რუსეთის ძალა ჩატრეული იქმნას ამ შორეულ  
ომში, საცა არც გერმანიას, არც ავსტრია-ჰუნგ-  
რეთს, არც იტალიას არავითარი არსებითი ინ-  
ტერესი არ მოეპოვება... განზრახვა კიდეც რომ  
არ ჰქონდეს სამთა-კავშირის რუსეთის უძლეუ-  
რებით ისარგებლოს ამ ომის დროს და რუ-  
სეთს შეესიოს, უეჭვოა თვითონ ეს კავშირი  
ომის შიშს ერთიანათ მოიშორებს თავიდან არა  
თუ კორეას ომის დროს, ათიოდე წლის განმა-  
ვლობაშიაც მას შემდეგ...

ჩვენი შეხედულობით—და რუსეთშიაც ბე-

ვრია ამ აზრის — რუსეთს ევროპასთან საღავი-დარაბო, საბრძოლო არა აქვს-რა, არც არა-ფერს ხეირს დააყრის ევროპასთან ქიშპობა. ევ-როპასთან შეტაკებაში ის ყოველთვის ყოფილა და იქნება უკან ჩამორჩენილ, უკუდამხევ მხა-რეთ. რუსეთი ევროპას მარტო იმ მხრით უნდა ეხებოდეს, რომ განათლებას და განათლების იარაღს იღებდეს მისგან. ევროპა რუსეთისთვის არსენალათ უნდა იყოს, რომლისაგანაც იმას შზა-მზარეული ცოდნა, სინათლე, იარაღი და თესლი გამოაქვს, თავისი თვალ-უწვდენელ და ხელ-უხლებელ მინდვრების დასამუშავებლათ, თავის უთვალავ და უჩინარ ხალხის ცხოვ-რებაში სინათლისა და კეთილ-დღეობის შესა-ტანათ. ამ გზით, და მარტო ამ გზით, მას, რო-გორც თვით თავის საკუთარ სამეფოს უმეტეს ნაწილში, აგრეთვე ბნელ და უბედურ აზიის ცხოვრებაში შეუძლია პირნათლი და სახეირო როლის ასრულება: წესის, სიმართლის, სინა-თლის და განათლების გავრცელება იმ უთვა-ლავ მილიონებს შეა, რომელნიც დღეს შორე-ალმოსავლეთში და მთელ აზიაში ცხვრის ფა-რასავით იკვებებიან. ბრწყინვალე და თან ად-ვილიც არის ეს როლი. მთელი ევროპა მას

ხელს შეუწყობს, როცა დარწმუნდება, რომ საკუთრივ მას მით როდი დაკლდება და ომის ნიადაგი შიში კი ასცილდება. როგორც საფრანგეთს გერმანიამ ხელი როდი შეუშალა ტონკინის, ტუნისის და კონგოს შეძენის დროს და ვრცელი მფლობელობის დაარსებაში სხვა და სხვა კოლონიებში, ისე, საფიქრებელია, რუსეთსაც, ინგლისს გარდა, სხვა მეტოქე არ გამოუჩნდება ევროპის სახელმწიფოებ შუა.

ამ ბუნებრივ, აუცილებელ მისწრაფებას რუსეთისას გაშლილ და უყინველ ოკეანესკენ ორი გზა აქვს, ერთი მახლობელი და მეორე შორეული. ახლო გზა კასპიის ზღვიდან სპარსეთზე გადის ინდოეთის ოკეანესკენ, ჩოხბართან. ამ გზას მარტო ათას ხუთასი ვერსტი აქვს სიგრძე. ამ გზაზე რუსეთს, ინგლისის გარდა, სხვა ვერც ერთი შესამჩნევი სახელმწიფო მოწინააღმდეგეთ და მეტოქეთ ვერ დახვდება. ინგლისის გარდა დანარჩენი ევროპის სარგებლობა მოითხოვს, რომ ეს გზა რუსეთმა გააწყოს და დაიკავოს. რუსეთის — და განსაკუთრებით ჩვენი ქვეყნის — ნაწარმოებს ეს გზა მოელი აზიის ბაზარს უხსნის. როცა ეს გზა გაიმართება, საქონელი ინდოეთში მაკარიიდან (ნიუნი-ნოვოგოროდი-

დან) უფრო იაფათ მივა, ვინემ ინგლისიდან. ამ გზის მფლობელი აზის მეუფე იქნება, აღებ-მი-ცემობაში მაინც. მეორე გზა, შორეული, ურა-ლის მთებიდან ციმბირზე ვაღის წყნარ ოკეა-ნესკენ, ვლადივოსტოკთან. ამ გზის სიგრძე ექვსი ათასი ვერსტია, ან, უფრო სწორეთ ვსთ-ჭვათ, შვიდი ათასი, თუ სიგრძეს ურალის იქი-თა მხრიდან კი არა, ვოლგიდან ვიანგარიშებთ. ოქროსა, ქურქის ან ფარჩის მეტი სხვა ვერა-ფერი საქონელი ვერ აიტანს ამ სიგრძე რკი-ნის-გზაზე გადაზიდვის ხარჯს. მაშასადამე ამ გზით გასაღდება წყნარ ოკეანეზე მარტო შო-რეულ ციმბირის და არა მთელის რუსეთის ნაწარმოები. ამას გარდა მარტო ინგლისის სარ-გებლობა კი არა, ბევრ სხვა ძლიერ და წარ-ჩინებულ სახელმწიფოების არსებითი ინტერე-სი თხოულობს, რომ რუსეთს ეს გზა შეეკრას და წყნარ ოკეანეზე უფლება არ მიეცეს. ამ გზაზე რუსეთს მეტოქეთ, მოწინააღმდეგეთ მარტო ინგლისი კი არა, ან ჩინეთი, იაპო-ნიაც ხდება და მასთან ამერიკის შეერთებუ-ლი შტატები და ევროპის ყველა ის სახელმწი-ფოები, გერმანიითურთ, ვისაც იმედი თუ განზ-რახვა აქვს ჩინეთს რამე ჩამორჩეს ან ჩინეთის

მემკვიდრეობაში წილი დაიდოს. რაღა სჯა სჭირია, ამ ორ გზას შეუ რომელი უფრო სახეობოა ჩვენთვის, რუსეთის ან მთელის კაცობრიობისთვის? რასაკვირველია, რუსეთს ორივე სჭირია; პირველი—თავის განსათავისუფლებლათ ევროპის ეკონომიურ მონაბისაგან, და მეორე—მისი თვალუწვდენელ და დაუმუშავებელი ციმბირის ასალორძინებლათ. თუ რუსეთს ღმერთი შეეწია და ორივე ეს გზა გაამართვინა, მაშინ მაგრათ ფეხის დადგმა წყნარ ოკეანეში გასავალზე აღმოსავლეთით—კორეას წვერთან, და სამხრეთით—სპარსეთის ნაპირზე, სრულიათ და სამუდამოთ დააკმაყოფილებს რუსეთის ინტერესს და საჭიროებას. მაშინ რუსეთისთვის არც შავი-ზღვის კარს ექნება დიდი მნიშვნელობა, არც ბალტიის ზღვის კარს, მაშინ ამ დიდ სამეფოს საკუთარი გზა და მსვლელობა ექმნება ნაშოვნი ყოველგან და ყოველთვის. მარტო მაშინ დაიწყება მისი ნამდვილი ზრდა, როგორც ეკონომიური, ისე პოლიტიკურიც, მარტო ამის შემდეგ მის წინ ფართოთ გადიშლება ის უსაზღვრო მსოფლიო ასპარეზი და დანიშნულება, რომელსაც მას უქადის მისი მდებარეობა ევროპის მეცნიერებასა და აზიის სიბნელეს შეუ...

რამდენათ სახეიროა ეს როლი, ყველაზედ  
უფრო ნათლათ გამოაჩინა იაპონიის ზრდამ.  
ვინ წარმოიდგენდა ამ ოც-და ათი წლის წი-  
ნათ ან ჩინეთში, ან თვით იაპონიაში, რომ ეს  
უკანასკნელი სამეფო მასზე ათჯერ უფრო ძლი-  
ერს ჩინეთს შეტაკებას გაუბედავდა, იმ იმედით,  
იქნება უშველებელი მისი ნაწილი, თორმეტ-  
მილიონ ხალხით დასახლებული, წავართვა და  
შევირჩინოთ? დღეს კი ევროპის განათლებამ,  
ევროპულმა წეს-წყობილებამ, ევროპულმა ია-  
რალმა და ხომალდებმა არა თუ ეს აზრი თავ-  
ში ჩაუდვა ამ შედარებით უმცროსს ერს, იმის  
მოფიქრებაც გააბედვინა, რომ ჩინეთის სატახ-  
ტო ქალაქს თავზე დავეცემი, ავიღებ და დავ-  
ჯაბნიო... დიდი მაგალითია ეს მთელის კაცობ-  
რიობისთვის, ყველა სახელმწიფოებისთვის! ამის  
შემდეგ ნურვინ ამაყობს ნურც სივრცით,  
ნურც რიცხვით.

ამის შემდეგ ყველასთვის, ვინც კი ერთია-  
ნათ არ დაბრმავებულა, ცხადია, რომ ძალა და  
ძლევა რიცხვსა და სივრცეს კი არა, **ცოდნას**  
და **ორგანიზაციას** ეკუთვნის, იარალს, წესს,  
დისკიპლინას. ჩინეთიც თუ მსწრაფლათ ამ გზას  
არ დაადგა და, იაპონიის მაგალითისამებრ,

თავის საშველათ ევროპულ მეცნიერებას არ  
შეუდგა, მისი სივრცე მისთვის შველის კი არა,  
დაღუპვის იარაღათ იქცევა. იმას ასო-ასოთ  
ჩამოათლიან მის ვრცელ და ოვალ-უწვდენელ  
პროვინციებს. მიწის სივრცე და ხალხის სიმ-  
რავლე უმეტარ და გაუწყობელ ქვეყნებისთვის  
მით არის საზარალო, რომ განსაკდელის თუ  
გასაჭირის დღეს მარჯვენა მხარემ არ იცის  
მარცხენას რა ემართება, და ერთი მეორეს ვერ  
შველის, ვერ თანაუგრძნობს. ამ გვარი ქვეყა-  
ნა, შინაგანი წესისა და წყობილების უქონე-  
ლობით, დამარაგებული მსხვერპლია პირველ  
ძლიერ ქარიშხალისა, რომელსაც ლუკმა-ლუ-  
კმა აქეთ-იქით გააქვს მისი ნაგლეჯები, რად-  
განაც მათ შორის ერთობა ინტერესების შეთან-  
ხმებაზე კი არა, ცარიელ დაჯაბნებაზე იყო დამ-  
ყარებული. ევროპული მეცნიერება და სამარ-  
თალი, სხვათა შორის, მითაც არის სასარგებლო,  
რომ ქვეყნის ერთობას და ძლიერებას მარტო  
ძალაზე კი არა, სამართალზე, ინტერესების შე-  
თანხმებაზე აარსებს. ეს საფუძველი რომ არ  
ჰქონდეს, მაგალითად, ინგლისის ზფლობელო-  
ბას, აბა სად იშოვიდა ის ამოდენა ქვეყნების  
დაკავების და შენახვის ღონეს?..

ეს გახლავთ პოლიტიკური მხარე ეგრეთ წოდებულ „კორეის ომისა“ იაპონიას და ჩინეთს შეუა. ამის შემდეგ მკითხველს ადვილათ შეეძლება თავის-თავათ დააფასოს ყველა იმ ახალი ამბების მნიშვნელობა, რომელსაც მას გაზეთები მოუტანენ. თვით ბრძოლის თაობაზე ისიც შეგვიძლიან ვთქვათ, რომ იაპონიის ფლოტმა თითქმის ერთიანათ მოუსპო ჩინეთს ხომალდებით ჯარის გზავნა კორეისკენ. ჩინეთს, ამის გამო, შეუძლიან კორეის დაცვა იმ საშუალებით, რომ ჯარი ხმელეთით უნდა მიაშველოს. უწინ გაგზავნილი ჩინეთის ჯარი იდგა პენ-იანგის სიახლოვეს, კორეის ჩრდილოეთ ნაწილში. ამ ჯარსა და კორეის სატახტო ქალაქს, სეულს, შეუა იაპონიას დიდ-ძალი ჯარი უყენია. გარდა ამისა იაპონიამ მოახერხა ზღვით გაეგზავნა მეორე ჯარი თვით კორეის და ჩინეთის საზღვარზე, იმ მიზნით, რომ ახალი ჯარი აღარ შეეშვა ჩინეთიდან კორეაში, და ძველათ შესულ ჯარისთვისაც სარჩოს საზიდო გზა გადაეჭრა. უკანასკნელ დეპეშებიდან სჩანს, რომ იაპონიის ამ ორ ჯარს ერთიანათ გაულენ-წავს და დაუტუსაღებია უმეტესი ნაწილი ჩინეთის ჯარისა კორეაში. ამასთანავე იაპონიის

ფლოტი, რომელიც ბევრათ უფრო ძლიერი  
და უკეთ გაწრთვნილია, ვინემ ჩინური, თითქმის  
წამდაუწუმ გარშემო დასტრიალებს ორს ძლი-  
ერს ციხეს, პე-ჩი-ლის სრუტეზე, ვეი-ჰი-ვეის  
და პორტ-არტურს. ეს ორი ციხე პე-ჩი-ლის  
ზღვის უბეს (заливъ) და ჩინეთის სატახტო  
ქალაქის, პეკინის, გზას იცავს. რადგანაც ამ  
ციხეების დაცვა ჩინეთისთვის თვალის-ჩინივით  
საჭიროა, რაც ჩინეთს საომარი ხომალდი ჰყავს,  
ყველა აქ არის თურმე შოგროვილი და უმო-  
ძრაოთ დგას ციხეების დასაცველათ. ჩინელე-  
ბი, ამასთან, საჩქაროთ ამაგრებენ ყველა გზებს,  
პეკინისკენ მომავალს, და უფრო გულ-და-  
გულ თავიანთი ადგილების დაცვას ცდილობენ,  
ვინემ კორეის დახმარებას, ანა-და იაპონიის  
აკლებას...

კორეას ხშირათ „განდეგილ სამეფოს“ უძა-  
ხიან შორე-აღმოსავლეთში, რადგანც ამ უკა-  
ნასკნელ დროში მართლაც რომ განდეგილის  
ცხოვრება ჰქონდა, ყველასგან მოშორებული,  
ყველასთვის მიუკარებელი. იაპონიას ჩინურათ  
**ჯი-პენ** ჰქვიან, ესე იგი „ამომავალ მზის სამე-  
ფო“. უწინ რა იყო, ვინ იცის, და ეხლა კი  
მართლა ამომავალ მზესავით ჰფენს იაპონია

ცოდნის და წესის სინათლეს როგორც გან-  
დეგილის სენაკში, ისე გარშემოც, მეზობლებ-  
ში. თვალ-ყურის გდების ღირსია, სწორეთ,  
მისი აწინდელი ბედი და თან-გადასავალი. მარ-  
თლაც, ამ შედარებით მცირე და განათლებაში  
ახლად შესულის, ჯერ დაუმთავრებელ ხალ-  
ხის გამბედავი, თითქმ მოუფიქრებელი დუე-  
ლი მასზე ათვერ უფრო ძლიერ ჩინეთთან, და  
მასთან, იქნება, **ბევრათ უფრო დაწინაურე-  
ბულ და შემძლე რუსეთთან, სხვა რომ არა**  
**იყოს-რა, დრამატიულ, თითქმის ტრალიკულ**  
**ინტერესით არის სავსე.** თუ ომი გაგრძელად და  
გაზვიადდა, ჩვენ არა ერთხელ გვექნება შემთ-  
ხვევა ამ მხარეს კიდევ დავუბრუნდეთ მის  
უფრო დაწვრილებით გამოსახვისათვის.

---

### ათი წლის უმაღლეს.

(1904)

როგორც წინასიტყვაობაშია ნათქვამი, დროშ  
ბევრი რამ შესცვალა შორეულ აღმოსავლეთ-  
ში ამ ათი წლის განმავლობაში — იაპონის შე-  
ტაკების შემდეგ ჩინეთთან ომის დაწყებამდე

რუსეთსა და იაპონიას შეუა. ძირიანათ შეიცვალა არა თუ გარემოება, თვით სიტყვების, სახელების და აზრების მნიშვნელობა.

ამგვარი ღრმა ცვლილებების მაგალითათ ავილოთ თუნდ სახელი „ციმბირის რკინის გზა“ (Великий Сибирский путь). ამ ათი წლის წინეთ ეს სახელი სულ სხვა რამეს ერქვა და სულ სხვა საგანს ნიშნავდა, ვინემ დღეს. ნუ იფიქრებთ, ვითომ განსხვავება მარტო იმაშია, რომ მაშინ გზა დამთავრებული არ ჰქონდათ, უფრო იოლათ შენდებოდა, ან უფრო ღარიბი იყო სადგურებით თუ ვაგონებით, ან ეხლანდელზე უფრო ნაკლებს გაზიდავდა და დახარჯავდა. არა. თვით მისი დანიშნულება, მიმართულება არსებითათ შეიცვალა იაპონიის ომის შემდეგ ჩინეთთან.

თავდაპირველათ, როცა ციმბირის გზის აშენება განიზრახეს თუ დაიწყეს, მას მარტო ეკონომიური მნიშვნელობა ჰქონდა. იმ გეგმის ძალით, რომელიც უმაღლესათ დამტკიცდა 15 და 21 თებერვალს 1891, რუსეთი შეუდგა—დიახაც საჭირო და სასარგებლო საქმეს—რკინის გზის აშენებას საკუთარ სამფლობელოში, თავის საკუთარი ქვეყნის, ციმბირის, დასამუ-

Шағерблаат, мис დაასაახლოვებლათ, ერთის მხრით, რუსეთის დანარჩენ მხარეებთან და, მეორეთი — იაპონიას ზღვასთან. იმპერატორი ალექსანდრე მესამის რესკრიპტი, 17 მარტს იმავე 1891 წ. მიწერილი მაშინდელ მემკვიდრის (ებლანდელი ხელმწიფის) სახელზე, ორჯერ მტკიცეთ ამბობს: ახალი გზის დანიშნულება — ციმბირის დაახლოვებაა რუსეთთან. „Повелѣвъ нынѣ приступить къ постройкѣ сплошной черезъ всю Сибирь жѣлѣзной дороги, имѣющей соединить обильныя дарами природы Сибирскія области съ сѣтью внутреннихъ рельсовыхъ сообщеній“... და მეტად კიდევ: знаменательное Ваше участіе въ начинаніи предпринимаемаго мною сего истинно народнаго дѣла да послужитъ новымъ свидѣтельствомъ душевнаго моего стремленія — облегчить сношениія Сибири съ прочими частями Имперіи“.

ეს არც ცარიელი სიტუაცია იყო: მაშინდელის გეგმით გზა ზღატოუსტიდან ბაიკალის ტბისკენ უნდა გაეყვანათ, იქიდან — სრეტენსკზე, მერე მდინარე ამურის მარცხენა ნაპირით ხაბაროვსკამდი, და იქიდან მდინარე უსურის მარ-

ჯვენა მხრით ვლადივოსტოკამდე. შენებაც ორივე მხრიდან დაიწყეს: ბაიკალიდან სრეტენ-სკამდი და ვლადივოსტოკადან — ხაბაროვსკამდი.

ეკონომიური დანიშნულება ამ რკინის გზისა ის იყო, რომ მას შეეძლო გაეზიდა რუსეთისკენ მარტო დასავლეთ ციმბირის ნაწარმოები, და ვლადივოსტოკს, ზღვისკენ, ამურის მხრის და ზღვისპირა ოქების (Приморская Область) საქონელი. ბაიკალის ტბიდან (ირკუტსკიდან) საქონლის პატრონს უფრო ხელს მისცემდა პეტერბურგის ნავსადგურისკენ გაეგზავნა თავისი სავაჭრო, ვინემ ვლადივოსტოკისკენ. მთელი გზის ქირას კი — რუსეთიდან ვლადივოსტოკამდე — ოქრო, ან დიბა, ან ფარჩა თუ აიტანდა, თორემ სხვა თითქმის ვერაფერი. არა თუ ინგლისიდან ან საფრანგეთიდან, თავათ პეტრებურგიდან უფრო სახეირო იყო მძიმე და იაფი საქონელის ვლადიოსტოკს ზღვით გაგზავნა ეგვიპტეს, ინდოეთის და ჩინეთის ირგვლივ, ვინემ ციმბირის რკინის გზით: უფრო მაღეც მივიღოდა ზღვით და უფრო იაფათაც, ვინემ ხმელეთით. თუმც ეკონომიური მნიშვნელობა ციმბირის გზისა ამნაირათ შემოფარგლული იყო, თავის ხარჯს და ფასს ის

მაინც დაფარავდა და ციმბირს, როგორც რუსეთს, სასიკეთოთ გამოადგებოდა. ეს უეჭვო იყო ყველასთვის, ვისაც კი ამგვარ საქმეებში რამე ესმის.

ამ ცხადს და ხმა-მაღლა აღნიშნულ ეკონომიურ დანიშნულებას ციმბირის რკინის გზისას თან ახლდა ის აუცილებელი შედეგი, — ნათლათ ნაჩვენები ჩემს ძველ ნაწერში — რომ ვინც ამოდენა ხარჯს სწევს ამხელა გზის გასაშენებლათ, ის მომავალში ვერ დაკმაყოფილდება ვერც ვლადივოსტოკის ნავსადგურით, რომელიც ზამთრობით იყინება, ვერც იაპონიის ზღვით, რომლიდან უყინავი გასავალი გაშლილ ოკეანეში რუსეთისთვის ადვილათ დაიკეტება. ამ შიზეზით შორს მჭვრეტელმა ინგლისის და იაპონიის მმართველებმა ციმბირის რკინის გზის შენობას თავიდანვე პოლიტიკური, სამხედრო მნიშვნელობა შესწამეს, და ეს ეჭვი ერთიანათ მოედო ორივე ამ ქვეყნის მწერლობას. ვლადივოსტოკი ნავსადგურათ არ ვარგა, ამიტომ რომ ზამთარში იყინებათ; მაშასადამე რუსეთი კორეას დაიპყრობს, რომ ხელში ჩაიგდოს უყინველი გასავალი ოკეანესკენო. რა მღელვარება და სიძულვილი ასტეხა ამ ეჭვმა იაპონიაში, გავი-

გებთ, როცა გავიხსენებთ, რომ 23 აპრილს 1891 წ.—ორი თვის შემდეგ, რაც ციმბირის რკინის გზა დამტკიცდა — იაპონელმა ფანატიკოსმა ვიღაც სანზო-ცუდან რუსეთის ტახტის მემკვიდრე — ეხლანდელი ხელმწიფე — კინალამ მოჰკლა ქალაქ ოთსუში. ბეჯითად შეიძლება სთქვას ჭარმა, ციმბირის რკინის გზამ თუ არ გამოიწვია, რამდენიმე წლით მაინც დააჩქარა იაპონიის ჩინეთთან შეტაკება, რომლის აშკარა მიზანი კორეის დაპყრობა იყო იაპონიისთვის. მიუხედავათ ამ გამწვავებისა, კიდევ მოსალოდნელი იყო 1894-ში, რომ დრო თავისას იზამდა და ყველასთვის სასარგებლო ეკონომიური ზედ-მოქმედება ციმბირის რკინის გზისა მშვიდობიანათ აშოვნინებდა მის საქონლისთვის თავისუფალ გასავალს გაშლილ ოკეანესკენ. ეს მით უფრო გააღვილდებოდა, რომ ციმბირის რკინის გზის მოძრაობის სისუსტე მაღე ყველას დაანახვებდა, თუ რამოდენათ უსაფუძვლოა ეჭვი — ვითომ მას შეუძლია არსებითათ შესცვალოს შორეულ აღმოსავლეთში სხვა-და-სხვა სახემწიფოების შუა ძალის სასწორი.

საუბედუროთ, იმ ეჭვმა და შეწამებამ, ვი-

თომ რუსეთი ციმბირის გზას ეკონომიურ და-  
ნიშნულებით კი არა, სამხედრო და პოლიტი-  
კურ მიზნით აშენებს, თავათ რუსეთზე სწო-  
რეთ იმნაირივე გავლენა იქონია, როგორიც  
ცნობილ სიტყვებს ჰქონდა: „კურტანი კურ-  
ტანზე არ დადგაო“. ციმბირის რკინის გზას  
გაშენება და დაბოლოვება რომ დასცლო-  
და იმ გეგმით, როგორითაც ის 1891-ში დაი-  
წყეს, უეჭველია მისი ნამდვილი ხასიათი და მოძ-  
რაობა ყველას თვალს აუხელდა: ზოგს ფრთას  
შეკვეცდა, ზოგს დაამშვიდებდა და ყველას აუშ-  
ფოთებლად, გონიერათ ამოქმედებდა. საქმე კი  
სულ სხვა ნაირათ დატრიალდა. იაპონიის ომმა  
ჩინეთთან გაუმაძლარი მადა აუძრა დედა მიწის  
უმთავრეს სახელმწიფოებს. მიბაძვით, რუსეთ-  
საც საღერღელი აეშალა.

ადვილათ მოსააზრებელია, რომ ევროპელი  
სახელმწიფოები ახალ-ახალ მხარეების და სამ-  
ფლობელოების შეძენას ცდილობენ: თავიანთ  
ქუეყანაში მათ ტევა აღარა აქვთ და მათი მრე-  
წველობა იქნამდი წარმატებულია, რომ მის ნა-  
წარმოებს შინაური ბაზარი როდილა ჰყოფნის.  
რუსეთს კი — პირიქით — მიწაც იმდენი აქვს, რომ  
რამდენიმე საუკუნის განმავლობაში ეყოფა შე-

სამუშავებლათ მის ხალხს, და მრეწველობაც  
ჯერ კიდევ აკვნიდან ვერ აუყენებია. სხვა სა-  
ხელმწიფოებს მიწა, სამუშავო მიწა, სჭირია;  
რუსეთს კი—მარტო გზა. აქედან ცხადია, რომ  
რუსეთის პოლიტიკა და მოქმედება სხვისას კი  
არ უნდა ბაძავდეს, თავის საკუთარ კვალს უნდა  
აღგეს.

იაპონიის ომის დროს ჩინეთთან, 1894-ში,  
რუსეთს—სხვისი წაბაძვის მაგიერ—თავისი შე-  
საფერი გზა რომ გამოეძებნა, მას არავითარი  
ანგარიში არა ჰქონდა ან ჩინეთს დახმარებო-  
და, ან იაპონიისთვის წინააღმდეგობა გაეწია, ან  
ვისმე გამოჰქომაგებოდა. ამ ომის დროს მას გულ-  
ხელი უნდა დაეკრიფა და გამოეცხადებინა—  
არავითარი განზრახვა არა მაქვს ჩინეთის მემკ-  
ვიდრეობაში წილი დავიდვა, ჩემიც საკმაო მაქვს,  
სხვისი არა მინდა რაო. მაშინ, უეჭვოა, ევ-  
როპის სახელმწიფოები ერთმანეთს დაექიშპე-  
ბოდნენ და დაერევოდნენ. ისინი ყველანი იაპო-  
ნიას წინააღმდეგობას გაუწევდნენ, თუ ომით  
არა, ბევრ სხვა საშუალებით. მაშინ, მთელი  
ქვეყანა ჩათრეული და ხელებ გაკავებული  
იქნებოდა ბრძოლაში (ომში მეთქი როდი ვამ-  
ბობ, ბრძოლაში) ჩინეთის მემკვირეობის გასა-

ყოფათ, რუსეთს გარდა. რამდენი ხარჯი შერჩებოდა ამით რუსეთს, რა ძალას და გავლენას შესძენდა მას ამგვარი მოქმედება ყოველგან, როგორც ევროპაში, ისე შორეულ აღმოსავლეთში, ეს ყველასთვის ცხადი და ადვილათ გასაგებია. ვინ დაუშლიდა მას მაშინ კორეის ხელუხლებლობის დაწესებას იაპონიისაგან — ესე იგი ბრაუტონის სრუტეს თავისუფლების დაცვას, — ან სპარსეთთან მეგობრულათ მორიგებას რკინის გზის გასამართავათ ინდოეთის ოკეანესკენ?

ამნაირ პოლიტიკას — რასაკვირველია — ის შედეგი მოჰყვებოდა, რომ იაპონია, ხანგრძლივ ბრძოლის შემდეგ ინგლისთან, გერმანიასთან და ამერიკასთან, მანჯურიას დაიკავებდა, და იქნება სხვა რამე ნაწილსაც ჩინეთისას. ინგლისიც და გერმანიაც ასე თუ ისე იძლებდენ გულს. და რაც უფრო ცხადათ გამოჩნდებოდა რუსეთის უანგარობა, მით მის აღებ-მიცემობას, მისი ციმბირის ეკონომიურ ზრდას უფრო თავისუფლათ დაუშკვიდრდებოდა მფლობელობა იმ ბრაუტონის სრუტისა იაპონიას და კორეას შუა, რომელიც უკეთესს გასავალს შეადგენს იაპონიის ზღვიდან გაშლილ ოკეანეს-

კენ. გინდ ასეც არ ყოფილიყო, რუსეთს და  
ციმბირს ოცი, ორმოცი წლის განმავლობაშიაც  
კი არ დასჭირდებოდა აუცილებლათ, მაინც  
და-მაინც, ეს ბრაუტონის სრუტე, და ამ ხნის  
განმავლობაში ჩინეთის მემკვიდრეობაზე დავა  
და ბრძოლა ყველა სხვა სახემწიფოებს იმოდე-  
ნათ დააუძლურებდა, რომ ხელ-შეუკვრელი,  
ხელებ-თავისუფალი, ბრძოლაში ჩაუთრეველი,  
მდიდარი რუსეთი რასაც ისურვებდა, იმას აას-  
რულებდა. ამას გარდა განა ცოტა რამეა ის  
აუცილებელი შედეგიც ამ პოლიტიკისა, რომ  
400 მილიონი სული ჩინელებისა, რუსეთის მოსა-  
ზღვრე 8000 ვერსტზე, გულწრფელი და სამუ-  
დამო მეგობარი შეიქნებოდა რუსებისა, და არც  
იაპონიას ჩაუვარდებოდა გულში ის მწვავი სი-  
ძულვილი რუსეთისა, რომელმაც ეხლანდელი  
ომი გამოიწვია...

იაპონიის ომის დროს ჩინეთთან, 1894-ში,  
შეუძლებელი იყო არ მეფიქრა, რომ სწორეთ  
ამნაირი გეგმა უნდა ჰქონდეს იმ მმართველე-  
ბის საქციელს, ვინც ციმბირის რკინის გზა  
დაიწყო. ვინ იცის, ამ გზის გაშენებაც რომ  
იმ ფინანსისტს დაცლოდა (ვიშნევრადსკის), რო-

მელმაც მისი დაწყება ხელმწიფეს გააბედვინა,  
იქნება საქმე მართლა ასე წასულიყო.

ციმბირის რკინის გზის აშენება და დამთავ-  
რება სულ სხვა პირებს ხვდა. ამათ იაპონიის  
ომმა ჩინეთთან სულ სხვა პოლიტიკა ურჩია.  
წაქეზებამ „კურტანი კურტანზე არ დაადგათო“  
ამ პირებს პირ-და-პირ შეატოპვინა იაპონიას  
და ჩინეთს შუა ატეხილ ბრძოლაში. გაიმარჯ-  
ვა თუ არა იაპონიამ ჩინეთზე, გალეჭი თუ არა  
მან ჩინელების ჯარი და ძლიერება, რუსეთმა მას  
1895-ში ულტიმატუმი გაუგზავნა: — „გაჩერდი,  
ჩინეთს თავი დაანებე, ნურაფერს სთხოვ, თო-  
რემ ან მე, ან შენო!“.

იმ დროს იაპონია ერთობ დაუძლურებული  
იყო ხანგრძლივის ომით და ჯერ კიდევ დაუ-  
მარაგებელი რუსეთთან საბრძოლველათ. ამიტომ  
მან რუსეთს დაუთმო და, არა თუ ბრძოლას,  
ნაშოვარსაც თავი დაანება.

ეს ამბავი 1895-ში მოხდა. რუსეთმა დაამ-  
ყარა ჩინეთის ხელუხლებლობა: ყველამ ერთმა-  
ნეთს შევფიცოთ ჩინეთს არაფერი წავართვათო.

ადვილათ წარმოსაღენია მაშინდელი რუ-  
სული გაზეთების აღტაცება ამ „გამარჯვებით“,  
რომელმაც ისინი იქნამდი დაათრო და გააბრუა,

რომ აღარც კი ვინმე დაფიქრებულა კითხვაზე: — „მერეო?“ — „ჩვენი რაო?“

ერთი წლის შემდეგ, 1896-ში, ამ კითხვის პასუხათ აღმოჩნდა, რომ რუსეთმა იაპონიას თურმე მიტომ არ მისცა ნება ჩინეთს რამე ჩამორჩენოდეს, და სხვა სახელმწიფოებსაც იმიტომ აცნობინა ჩინეთის ხელუხლებლობა, რომ განზრახვა ჰქონდა ჩინეთის მემკვიდრეობიდან არავის არაფერი დაანებოს და თვითონ კი ჩინეთს მთელი მანჯურია ჩამოაცალოს.

სხვა სიტყვებით რომ ვსოჭვათ, გამოდის: რუსეთი ისეთ პოლიტიკას დაადგა ჩინეთში, რომელიც ჩინეთთან აერთებს და აკავშირებს ყველა სახელმწიფოებს მარტო ერთი რუსეთის წინააღმდეგ.

ლირდა ამათ მანჯურია? რა საჭირო იყო მანჯურია რუსეთისთვის?

პოლიტიკოსი, ეკონომისტი, ფინანსისტი ვერ მიხვდება, რისთვის მიითვისა რუსეთმა მანჯურია, როგორ და რისთვის შეპყო და გააბათვი იმ მახეში, რომელიც ისე ეადვილებოდა სხვისთვის დასაგებათ. ამას ახსნის შხოლოთ ის გარემოება, რომ იმ დროს მმართველებათ რუსეთს რკინის გზის მოხეელები ჰყავდა. გასაკ-

ვირველი როდია, რომ ამ პირებმა გამარჯვებულ იაპონიაზე „გამარჯვების“ შემდევ, იმავე ჩვეულებებს დაადგენ შორეულ-აღმოსავლეთში და იგივე გადაწყვეტილებები მიიღეს ციმბირის რკინის-გზის შესახებ, იგივე ზომები იხმარეს, როგორც ნაჩვევი იყვნენ რუსეთის მინდვრებზე გზების გაყვანის დროს. ჩინელებს, იაპონელებს, მანჯურლებს, მათ სურვილს, უფლებას, სარგებლობას, მომავალს, იმათ სწორეთ იმოდენივე ყურადღება მიაქციეს, რამდენსაც ხახოლების, კირგიზების ან ლეკების ინტერესებს ათხოვებენ ხოლმე რკინის გზის შენების დროს.

იაპონიამ კუდი ამოიძუა თუ არა, ამ მმართველებს სხვა აღარაფერი უფიქრიათ და უანგარიშიათ, გარდა იმისა, რომ „არიქა, მალე, კურტანი კურტანზე დავადგათო!“ არც აცივეს, არც აცხელეს, აღიჭურვენ რკინის-გზის მდაბიო მოხელის ცოდნით და იარაღით, და მეცნიერულათ გაიშალეს წინ შორეული აღმოსავლეთის რკება. არ მოეწონათ ზედ დანიშნული ციმბირის რკინის-გზის პირვანდელი გეგმა. მართლაც, მისი ხაზი ბაიკალს იქით სწორეთ როდი მიდიოდა, მეტათ მრუდეთ, მშვილ-

დივით ირგვლივ უვლიდა ამურის მდინარეს. ფარგლით გაზომეს ეს მშვილდი. აღმოჩნდა — ბაიკალიდან ვლადივოსტოკამდი მას 2800 ვერსტი სიგრძე ჰქონდა. გაიხსენეს: აკი ნიკოლოზ პირველმა, როცა მოსკოვს რკინის გზით უერთებდა პეტერბურგს, სამართით ხაზი გაავლო რუსაზე და გზა ისე გააპირდაპირაო. — რისი გამარჯვებულები ვიქნებით იაპონიაზე, თუ ჩვენც ასე არ მოვიქეცითო? აიღეს სამართი და რუსაზე ხაზი გაატარეს ლარივით, პირდაპირ ბაიკალიდან ვლადივოსტოკამდე. ფარგლით რომ ეს ლარი გაზომეს, გამოვიდა, რომ მას სულ 2100 — 2200 ვერსტზე მეტი სიგრძე არ ექნებოდა. ცხადია, ახალი, ლარივით პირდაპირი გზა ექვსასი ვერსტით უფრო მოკლე იქნებოდა, ვინემ თავდაპირველათ განზრახული. და რადგან თითო ვერსტის გაშენება ჯდებოდა მაშინ 60,000 მანეთათ, ამ შემოკლებით და გაპირდაპირებით ხაზინა ოცდა თექვსმეტ მილიონ მანეთს მოიგებდა. ხუმრობაა ამოდენა ფულის შენახვა!?  
Ура!!

ერთი პაწია დაბრკოლება ახლდა მათ ახალ გეგმას: გაპირდაპირებული გზა სანახევროთ რუსეთის სამფლობელოში და მეორე ნახევრით

ჩინეთის სამთავროში, მანჯურიაში, უნდა გა-  
შენებულიყო. ჩოთქში, მაშინ, არავის არ ჩა-  
უგდია რიგიანათ, რა დაჯდებოდა იმ უცხო  
ქვეყნის შეძენა, რომელშიაც გზა უნდა გაშე-  
ნებულიყო, და მერმე ამ გზის დაცვა. ამისთა-  
ნა კითხვები, რუსეთში რკინის გზების აშენე-  
ბის დროს, ხომ არავის არასოდეს არ დადგო-  
მია წინ. აქაც ეგონათ იტურების ბრძანე-  
ბას გამოვიტანთ, პოლიცეისკая იპის-ს შე-  
ვადგენთ, და მერე მანჯურლები წავიდნენ, თა-  
ვი ქვას ახალონ, სულში იჩივლონ. განა-  
ბრეხუნთ-ები ცოტა გვყავს, ვიქირავებთ მათ  
მოსაგერებლათ.

ոև զարյացնեած, հռմ թաճչուրու հինյուուս և ա-  
կալուրու ուղարկու, ոմազը հինյուուս, հռմլու և ու-  
պրիկօսնունուստիւ-ու տցուուն հուսեցում յրտու  
թլու թինյու ծառալատ գաօխալու և արա ու թաճչու  
ուածունուս, թոյլ չվեցանու ալուարյունու, հա թո-  
սալյու ուղարկու թեցալունունու հյունու ցիւս թո-  
ելյույնուսացան? — հինյուու հայեցան օւալյունուրու,  
այս ՇահՇան ուածունուս ելուունու զուեցնուու? մա՞՛  
հալաս օւազուկազեցնու? ու յու, օւալյունուրու,  
ամսուրուս թեարյու ասց օւազուսակալուրու, ուսուրու  
չվեցանուր մոյքուած Շեցուրինյու, ուց հռմ Քար-

ბაზანი კი არა, თოფიც არ დაგვიცლია მათ  
დასაპყრობლათ, ეხლა ჩვენგან დავალებულებს  
რაღა ხმა ამოელებათო? ნაოხრალია, შეგვრჩე-  
ბაო!

აი, როგორ მოხდა, რომ რუსეთის სამფლო-  
ბელო—ამურის მხარე—განზე დასტოვეს, ნოვ-  
გოროდივით ან ქუთაისივით, და გზა „прамо-  
линейно“ ბაიკალიდან ვლადივოსტოკს ლა-  
რივით დაუპირდაპირეს. მერე, როცა დაინახეს,  
რომ ვლადივოსტოკში ნავთსადგური ზამთრო-  
ბით იყინება, იმავე სამართით იმავე მანჯური-  
აზე მეორე ხაზი გააყოლეს, უყინველ ოკეანე-  
ზე ნავთსადგურისკენ, რომელსაც პორტ-არტუ-  
რი ჰქვია, და გულში სთქვეს:

→ ვაი დამარცხებულს... და გამარჯვებულ-  
საცო...

მაშინ რუსეთის გაზეთებმა ალტაცებით გა-  
მოაცხადეს გაშლილ ოკეანეზე უყინარი ნავთ-  
სადგურები ვიშოვეთო, და აწი რუსეთის ბედს  
ძალლიც ვერ დაჰყეფსო!

ამ ახალის გეგმით გაშენდა და გაიხსნა ციმ-  
ბირის რკინის გზა, ველიკი ციმბირი ციმბირი  
და ამნაირათ იშოვნა რუსეთმა უყინარი გასა-  
ვალი გაშლილ ოკეანეზე. მაგრამ, როგორც

არც ეს რკინის გზა ჩამოგავდა თავის დანიშნულებით და მდგომარეობით იმას, რომელსაც ციმბირის რკინის გზის სახელი ერქვა 1894-ში, ისე ეს გასავალი გაშლილ ოკეანეზე — პორტ-არტური — ბრაუტონის სრუტეს მაგიერობას ვერ იზამდა. ბრაუტონის სრუტეს ერთი ნახევრის შეძენა რუსეთისგან, ინგლისის მეტს, თითქმის არავის დაჩაგრავდა. იაპონიას ამით დიდი ზარალი არც კი ექნებოდა, რაღანაც ამ სრუტეს მეორე ნაპირი ხომ მის საკუთარ მფლობელობაში არის და დარჩებოდა. რუსეთისთვის ადვილათ შესაძლებელი იყო, სამაგიეროთ, სხვა რამე შესაფერი სარგებლობა მიეცა — ან ეშოვნინებია — იაპონიისათვის. რუსეთისგან პორტ-არტურის და მანჯურიის შეძენა კი ჩინეთის კარს სრულებით უკეტდა არა მარტო იაპონიას და ინგლისს, ყველა დანარჩენ სახელმწიფოებსაც. რუსეთი პორტ-არტურში სავაჭრო საქმეს რომ ვერ გამართავდა, ამას რკინის გზის სიგრძე და სიძვირე ამხელდა. არა თუ რუსეთიდან, ბაიკალიდანაც კი არ მისცემდა ხელს საქონლის პატრონს ამ რკინის გზით რისამე ზიდვა წყნარ ოკეანესკენ. მაშასაღამე, რუსეთმა პორტ-არტური იმიტომ შეიძინა და შიგ ფე-

ხი იმიტომ გაიმაგრა, რომ განზრახვა აქვს გუშაგათ დაუდგეს ჩინეთს, და არც ჩინეთი გაახაროს, არც სხვა ვინმე შიგ ასარგებლოს. პორტ-არტური შორე-აღმოსავლეთის თუ არა, ჩინეთის სტამბოლია. ის იმ სრუტეს ჰკეტავს, რომელიც ჩინეთის შესავალს, პეჩილის ზღვის უბეს, წყნარ ოკეანესთან აერთებს. პორტ-არტურის მფლობელის ნებადაურთველათ ჩინეთში ვერავინ შევა და ჩინეთიდან ვერავინ გამოვა. ცხადია, ამ გვარ სრუტეს რუსეთს არავინ დაუმობდა უბრძოლველად.

სხვაც ყოველივე სწორეთ იმნაირათვე შეიცვალა 1894 წლის აქეთ, როგორც ციმბირის რკინის-გზის ან წყნარ ოკეანეზე გასვლის მნიშვნელობა. მის მაგიერ, რომ ჩვენი საკუთარი სამფლობელო გაგვემდიდრებია რკინის-გზის გაშენებით, ჩვენ სხვისი გავაკეთეთ და ჩვენი დავალარიბეთ. მის მაგიერ, რომ ჩინეთის მემკვიდრეობის მოლოდინზე ყველა სხვა სახელმწიფოები ერთი მეორის წინააღმდეგ მიგვესია, და ჩვენ ამ შფოთში განზე გავმდგარიყავით, შუაგულ ბრძოლაში შევვარდით, და ყველას მუშტი ჩვენი თავისკენ მივიწვიეთ. თვით გუშინდელი ერთმანეთის სისხლის მსმელი მტ-

რებიც, იაპონია და ჩინეთი, არა თუ შეარიგა, გააამხანავა, დააძმობილა, დააკავშირა ამ ნაირმა ჩვენმა მოქმედებამ, და თითქო ეს ორი დაკავშირებული სახელმწიფო, 500 მილიონი ადამიანის პატრონი, საკმაო არ იყო ჩვენ სამტროთ, მათ კავშირს ინგლისის, ამერიკის შტატების და თითქმის მთელი ევროპის დახმარება და თანაგრძობა შესძინა...

ამ საქციელმა გამოიწვია ინგლისის კავშირი იაპონიასთან, რუსეთის სპარსეთში უმოქმედობა ინგლისის ბურებთან ომის დროს, რუსეთისგან მანჯურიის დაცლის მოთხოვნა. სხვა და სხვა ევროპის და ამერიკის სახელმწიფოების მხრით, და, ბოლოს, იაპონიის გამოლაშქრება რუსეთზე. მარტო ამ უკანასკნელმა ომმა აუხილა თვალი რუსეთის საზოგადოებას. მარტო მას აქეთ, რაც აღმოჩნდა ომის მძიმე ხასიათი, ეს საზოგადოება დაუკვირდა იმ გარემოებებს, რომლის გამოწვეულია ეხლანდელი შეტაკება.

რაკი 1895-ში იაპონიას რუსეთი გზაზე გადაელობა, რაკი 1896, 1898 და 1901-ში რუსეთმა მანჯურიაში რკინის გზის შენება დაიწყო, პორტ-არტური დაიკავა და მანჯურია დაისაკუთრა, ვინ წარმოიდგენდა ამის შემდეგ,

რომ ამ რკინის-გზის ამშენებლები, ამ პორტ-არტურის დამკავებლები წინათვე არ იანგარა-შებდენ რამოდენა ძალა — და როგორი ძალა — აუცილებლათ საჭირო იქნება რუსეთისთვის, იმ მდგომარეობის დასაცველათ, რომელიც მან შორეულ აღმოსავლეთში დაიკავა? არი ათას სამას სამოცი ვერსტის რკინის-გზის დაცვა და შენახვა მტრის ქვეყანაში რამხელა ჯარს მოითხოვდა, რა დაჯდებოდა, ნუ თუ ძნელი წარმოსადევენი იყო? ამ გზის და პორტ-არტურის გამო იაპონია და ჩინეთი, მათი დამხმარე ინგლისით და ამერიკით რომ წინ აღგვიდგებოდნენ, იმათ წინააღმდეგ რომელი ძალა დაგვჭირდებოდა, ესეც ნუ თუ დიდი ჭიუის საქმე იყო საანგარიშებლათ? იმას ვინ წარმოიდგენდა, რომ 1895-ში თავის გაჩერებას, თავის ალაგ-მვას, თავის გაწბილებას და შერცხვენას იაპონია ჩვენ მუქთათ შეგვარჩენდა და მაგიერს არ გადაგვიხდიდა? ნუ თუ შესაძლებელი იყო ვის-მე ეფიქრა, რომ მმართველები, რომლებმაც აი ეს ახალი მიმართულება მისცენ საქმეს, არც რკინის გზის და პორტ-არტურის დასაცველათ საკმაო ძალას დაიმარაგებდენ, არც იაპონიის მოსაგერებლათ დაემზადებოდენ, არც

ჩინეთის მომავალ ზრდას მიიღებდენ მხედველობაში, არც ევროპისა და ამერიკის ინტერესებს და წინააღმდეგობას ჩააგდებდენ ჩოთქში? არც იაპონია მაღავდა თავის გამწარებას და მზადებას, არც ევროპის მწერლობა საიდუმლობად ხდიდა იმ გარემოებიდან, რომ იაპონიასა და რუსეთს შეუ დიდი შეტაკება უნდა მოხდეს მალეთ. ბოლოს იაპონიისა და ინგლისის ერთმანეთთან აშკარა დაკავშირებამ ხომ ბრძებსაც კი აუხილა თვალები. მარტო ის ჩვენი რკინისგზის მოხელეები არას ეჭვობდენ, არას გრძნობდენ და ანგარიშობდენ, არას ელოდენ, არც ემზადებოდენ.

იაპონია ისეთი სახელმწიფოა, რომელსაც ყველა მხრიდან ზღვა უვლის და მწყესავს. როგორც კუნძულელ ან ზღვის სახელმწიფოს, მას, თუ მოერევა ოდესმე ვინმე, მოერევა მარტო ზღვით, ზღვის ძალით, ფლოტით. ინგლისი, აგრეთვე კუნძულელი სახელიმწიფო, ბევრათ უფრო ახლოთ ახლდა ნაპოლეონ დიდს, ვინმე დღეს იაპონია რუსეთს, მაგრამ ნაპოლეონ დიდმა ვერაფერი დააკლო რა ინგლისს, თუმც მას ხელში მთელი ევროპის ძალა ჰქონდა და რუსეთიც ამ ბრძოლაში ამხანაგათ ჰყავდა. რო-

გორ დაავიწყდათ ეს მაგალითი ჩვენს მმართველებს? ვინ წარმოიდგენდა, რომ 1895-წლის შემდეგ ისინი დღე-და-ლამ სულ ფლოტის მზადებაში არ იყვნენ, იმ აუცილებელ ბრძოლისთვის, რომელიც თვითონვე გამოიწვიეს იაპონიის წინაღამდეგ გამოსვლით ჩინეთის ვითომ საშველად? ვინ იფიქრებდა, რომ ამხელა რკინის გზის გამშენებლები უცხო ქვეყანაში, არც იმ რკინის გზისთვის ნახშირის მაღნებს მოძებნიდნენ და დაიმარაგებდნენ, არც მის მთავარ ნავსადგურისთვის დოკებს გააკეთებდნენ გემების დასაკერებლათ, არც ფლოტისთვის ნახშირის სადგურებს დამზადებდნენ იმ თვალ-უწვდენელ ზღვებზე, რომელიც რუსის ხომალდებმა უნდა გადაიარონ პეტერბურგიდან ან ოდესიდან პორტ-არტურამდე მისასვლელათ?

ყველა ეს წარმოუდგენელი რამ ნამდვილი გამოდგა. როცა იაპონია წრეულს დაგვეტაკა, დაუმარაგებელი დავხვდით მას შორეულ აღმოსავლეთში, უჯაროთ, უგზო-უკვლოთ, უფლოტოთ, უპლანით. მოგეხსენებათ, რა შედეგი მოჰყვა ამ უთავბოლობას.

საუბედუროთ, ომი, როგორც ეტყობა, დიდხანს უნდა გაგრძელდეს: არც ერთს მეომარ

შხარეს იმდენი ძალა არა აქვს, რომ მოწინაა-  
ღმდეგეს შერიგების თხოვნა დააძალოს. რუ-  
სეთმა ხმელეთზე ერთიანათაც რომ დაულეწოს  
იაპონიას ჯარი, მაინც ცოტა ხანს შემდეგ მას  
მეორე, მერე მესამე ჯარი ამოუვა ზღვიდან  
ხმელეთზე. იაპონიას 50 მილიონი ხალხი ჰყავს;  
მაშასადამე მას იმდენი ჯარის გამოყვანა შეუ-  
ძლია, რამდენიც გერმანიას, ან საფრანგეთს.  
ამას გარდა იაპონიას რუსეთის მეტი მოწინაა-  
ღმდეგე არავინ ჰყავს, და, ზღვის წყალობით,  
შეუძლია შინ ჯარი არ დაირჩინოს. ყველა  
თავის მეომრების გამოყვანა შეუძლია მას რუ-  
სეთის წინააღმდეგ. რუსეთს კი მეოთხედი თა-  
ვის ჯარის მეტის გაგზავნა არ მოუხერხდება  
იაპონიის წინააღმდეგ, ამიტომ რომ მას, რო-  
გორც ევროპაში, ისე აზიაში, ერთობ გრძე-  
ლი, თვალ-უწვდენელი საზღვარი აქვს ხმელეთ-  
ზე, ისეთები, სადაც გარეშე მტერს ადვილათ  
შემოსევა შეუძლია. ამას გარდა იაპონიას სულ  
ორას-სამასი ვერსტი აქვს გასავლელი შინიდან  
ბრძოლის ველამდი. რუსეთს კი 10.000 ვერს-  
ტი აქვს გადასავლელი: სად შინ, თავისას,  
ბრძოლა, სად—ცხრა მთას გადაღმა!

ეს სიძნელე და სიშორეც რომ არ იყოს,

მაინც, ვიმეორებ, მარტო ზღვით, ფლოტით  
შეიძლება იაპონიის შემუსრვა და არა ხმელე-  
თით. და ფლოტი რუსეთს ჯერ საკმაო არა  
ჰყავს ამისთვის. ახალის შოვნამდი კი, რასაკვირ-  
ველია, არა ერთი და ორი წელიწადი გაივლის.

რუსეთისთვის ეს მძიმე განსაცდელი უიმედო  
როდია: ამისთანაები დამართნია მას განა? ბევ-  
რი უარესი გაჭივრებიდან გამოსული რუსეთი,  
განახლებული, გაძლიერებული, დროებით და-  
მარცხების და დასუსტების შემდეგ. უეჭვოა,  
რომ ეხლანდელი შოლტიც მას დიდ წინმსვლე-  
ლობას მისცემს:

...Такъ тяжкій млатъ,

Дробя стекло, куеть булатъ.

მის შინაგან საქმეებში და წეს-წყობილებაში  
ეს ომი, უეჭვოა, დიდ ცვლილებას და გაუ-  
მჯობესებას შეიტანს. ღმერთმა ჰქნას ოლონდ,  
რომ ჩვენმა მხარემაც, სრულ მონაწილეობის  
მიღებისთვის ეხლანდელ მსხვერპლში და გან-  
საცდელში, უნაკლულოთ ისარგებლოს მომა-  
ვალ წარმატებით, რომელმაც სამუდამოთ უნ-  
და იხსნას რუსეთი ამგვარ შეცდომების გან-  
მეორებისგან.



401

„ცოდნა“-ს წიგნის მაღაზიაში ისყიდება:

იაპონია, ნ. ნიკოლაძისა . . . . .	20 პ.
კალენდარი „ცოდნა“ . . . . .	10 პ.
დიდი სურათთ შოთა რუსთაველისა . . . . .	50 პ.
ლექსები ილია ჭავჭავაძისა—სურათით . . . . .	15 პ.
რაჭა (გზა და გზა) სოსიქო მერკვილაძისა . . . . .	20 პ.
რაშია ბელნიერება? იახე რაჭველისა . . . . .	10 პ.
სამშობლო და კაცობრიობა . . . . .	10 პ.
სიმღერა აკაკისა სურათით . . . . .	15 პ.
წმინდა გიორგის რაზმი აკაკისა . . . . .	5 პ.
გრიგოლ ორბელიანის ლექსები . . . . .	20 პ.
კულტურა ლიპერტისა, ნათ. კ. ყიფიანისა . . . . .	50 პ.
ლექსიკონი რუსულ-ქართული . . . . .	50 პ.
სამეგრელოს საერო სკოლები ლ. ლოლუაში . . . . .	5 პ.
ბაში აჩუქი აკაკისა . . . . .	30 პ.
სომეხთა მეცნიერნი და ქვათა ღალადი ი. ჭავჭავაძისა . . . . .	30 პ.
დამაკვირდი—ბრძენთა და მეცნიერთა აზრები . . . . .	50 პ.
თავ-გადასაგალი აკაკისა . . . . .	1 პ. —
სიტყვიერების თეორია ე. კ. . . . .	1 პ. —
გლეხი-კაცის ისტორია მე-2, მე-3 და მე-4 ნაწ. 1 — 80	
დამონებულნი, ნათ. სახოკიასი . . . . .	1 პ. —
ლექსიკონი ქართ.-რუსული ჩუბინაშვილისა ყდით 9 პ.	
ამგვარივე რუსულ-ქართული ყდით . . . . .	3 პ. —
ლექსიკონი საბა სულხახ ორბელიანისა . . . . .	2 პ. —

თხზულებანი: კაკი წერეთლისა, ილია ჭავჭავაძისა, ალ. ყაზბეგია, მამრა გურიიელისა, გიორგი წერეთლისა, გრ. აბაშიძისა, სილოვან ხუნდაძისა, ვაჟაფშვილისა, არაივისპირელისა, ია ეკბლაძისა და სხვათა.

სურათები: შოთა რუსთაველია, აკაკისა, გიორგი წერეთლისა, ნიკ. ბარათაშვილისა და სხ. 30 — 70

აქვე იყიდება სკოლების სახმარებელი სახელმილვანელოები და აოცილგვარი ქართული წიგნები.

ვინც მარისურვაბს წიგნების დაბარებას, ლაუკონებლივ გაეგზაფნება ფას დაცებითაც.

მისამართი ფოსტით: თიფლის, კურ. მაგ. „ციდნა“.

მაღაზიის პატრონი სოსიქო გერმანი გერმანიაშვილი.